

Gepubliseer op:

Deur Christus Alleen

Tuisblad van dr. A.H. Bogaards

www.enigstetroos.org



Preke Sotho

Ds Thamae

BALA: JONASE 3:1–10

TEMANA: 4,10

Jonase a qala ho kena motseng a ntse a howa, a re:

(4) *“KAMORA MATSATSI A MASHOME A MANE, NINIVE O TLA TIMETSWA” Jonase 3:4*

(10) *“Yitse ha Modimo o bona ho etsa ha bona, kamoo ba sokolohang metsamaong ya bona e mebe kateng. Modimo le wona wa kgutla bobeng boo o neng o itse o tla bo etsa ho bona, mme ha o a ka wa bo etsa.”*

Moo re badileng teng re bolellwa ka pitso ya Jonase ya bobedi, ho isa Lentswe la Modimo motseng o moholo wa Ninive. Re tla hopola, phutheho ya Modimo, hore Jonase ha a ne a romilwe ke Modimo Ninive lekgetlong la pele, o ile a balehela Tarshishe, ka ho nka sekepe se yang teng.

Jonase o fumana mohau wa Modimo, a tshwarelwa sebe sa hae sa ho balehela thomo ya Modimo ho Ninive. Thapi ya mo hlatsetsa lebopong ka thoko ho lewatle a ntse a phela. Pholoso ena ya Jonase e etsa hore re utlwisise tshwarelano ya melato yeo Lengolo le Halalelang le re rutang yona. Ha re tadima thapelo yeo Morena Jesu Krete a re sietseng yona. Re utlwa mantswe a reng:

“O re tshwarele melato ya rona, jwaleka ha re tshwarela ba nang le melato le rona” (Mattheu 6:12).

Thapelo ha e tswela – pele e re: *“Hobane ekare ha le tshwarela batho ditlolo tsa bona, Ntata lona ya mahodimong, o tla le tshwarela le lona, empa ekare ha le sa tshwarele batho ditlolo tsa bona, Ntata lona le yena a ke ke a le tshwarela ditlolo tsa lona” (Mattheu 6:14,15).*

Mohau ona wa Modimo wa ho tshwarela Jonase sebe sa hae ke lona lebaka le leholo leo re bonang Modimo o boetse o mo roma hape Ninive ho ya phetha thomo ya wona. Molaetsa wa Modimo oo Jonase a tshwanetseng ho o hasa Ninive ke o reng:

(4) *“KA MORA MATSATSI A MASHOME A MANE NINIVE O TLA TIMETSWA”.*

Temane ya rona ya bone e baleha jwalo (Jonase 3:4).

Phutheho ya Modimo, re ka botsa potso ya hore: *“HOBANE MODIMO O TLISANG KOTLO MOTSENG ONA O MOHOLO WA NINIVE?”*

Karabo ke hore: Modimo o kgalemela sebe, kotlo e tlela motse ona ka lebaka la hoba motse wa Ninive, setjhaba sa teng ha se sa hlompama Modimo. Moapostole Pauluse ha a tshehetsa taba ena o re:

“Hobane moputso wa sebe ke lefu, empa neo ya mohau wa Modimo ke bophelo bo sa feleng” (Ba-Roma 6:23).

Motse ona o ne o tletse bokgopo. Batho ba ne ba phela jwaleka ha e ka Modimo o ke ke wa ba botsa ka bokgopo ba dibe tsa bona. Ho ne ho rena tshollo ya madi le dipolayano tse senang keello.

Ha Jonase a ntse a hlaba mokgosi, a hweletsa hore: “*KA MORA MATSATSI A MASHOME A MANE NINIVE O TLA TIMETSWA*” (Jonase 3:4). Morena wa Ninive le matona a hae ba ile ba kgothatsa setjhaba ho amohela molaetsa wa Modimo o tlang ka Jonase, le hore ba sokolohe. Batho ba ile ba kopjwa, e mong le e mong ho furalla metsamao ya bona e mebe e kgopo. Bohle ba ne ba lebetse mohau wa Modimo ho bona, le ho ba tshwarela dibe tsa bona. Le hore Modimo o tla kgutla bohaleng ba kgalefo ya wona, O ba tshwarele dibe tsa bona ba se ke ba timela.

Temane ya rona ya ho qetela e re:

(10) *ITSE HA MODIMO O BONA HO ETSA HA BONA, KAMOO BA SOKOLOHANG METSAMAONG YA BONA E MEBE KATENG. MODIMO LE WONA WA KGUTLA BOBENG BOO O NENG O ITSE O TLA BO ETSA HO BONA, MME HA O WA KA WA BO ETSA (Jonase 3:4).*

Phutheho ya Modimo mane Ninive re bolellwa hore Morena le matona e mong le e mong ba ile ba amohela Lentswe la Modimo le ileng la phatlalatswa ke Jonase, yaba ba sokoloha mekgweng ya bona e mebe. Ba ile ba inyatsetsa dibe tsa bona ho Modimo. Ha Modimo o bona hore diketso tsa batho di supa hore ba baketse bokgopo boo ba neng ba bo etsa. O ile wa ba tshwarela dibe tsa bona, wa ba utlwela bohloko, wa ba hauhela. Ha o waka wa hlola o ba otlela dibe kapa ho ba timetsa.

Ho jwalo, baratuwa Moreneng, Modimo o roba tshepiso ya wona ya ho otlela moetsa-dibe dibe tsa hae. Ha moetsadibe a sokoloha, a bakela dibe tsa hae. Ha re bala ho Esekiele 33:14,15,16 re utlwa ka mohau wa Modimo ho moetsadibe.

Lentswe le re: “*O FELA O TLA SHWA! HA MOLOTSANA A KA BAKA SEBENG SA HAE, A YA KA TAELO LE KA HO LOKA, (15) HA MOLOTSANA A KA BUSA TEBELETSO, A BUSA SEO A SE UTSWITSENG, A TSAMAYA KA DIKOMELO TSA BOPHELO, A SA ETSE BOKGOPO, KANNETE O TLA PHELA, HA A KAKE A SHWA. DIBE TSOHLE TSEO A SITILWENG KA TSONA, HA DI SA NA HO HOPOLWA HO MO TSWA (Esekiele 33:14, 15, 16).*

Baratuwa ba Morena, re bontshitswe mohlala o motle ke morena le matona, e leng baetapele ba setjhaba motseng wa Ninive. Ba bontshitswe ruri, hore tumelo ho Modimo le ho Jesu Krete ke ntho e ntle, ha ena le mesebetsi e metle, ya ho hlompa Modimo. Metse yeo re phelang ho yona, e metle e meholo, empa e tshwantshwa le motse wa Ninive. Ho tletse bokgopo ba dibe ho yona tse etswang ke batho. Dipolao di ngata, dipeto di ngata. Dintwa le meferefere di a rena. Tshollo ya madi le boshodu ke dintho tse tlwaelehileng. Morena Jesu o rometse bahlanka ba hae.

Ba bang ba jwaleka bo Jonase le Petrose, phiri e ne e se e ba jele. Morena Jesu o ba hauhetse a ba tshwarela dibe tsa bona. Jwale, e se e le ba buseditsweng ditulong tsa bona. Thomo ena ya Morena, ya ho boela ba rongwa ho ya phatlalatsa Lentswe la Modimo, le evangedi ya Jesu Krete ho metse ya rona e meholo e tshwanang le ya bo-Ninive, Sodoma kapa Gommora jwaleka Jonase e se e le pitso ya bobedi ho bona. Morena a ke a re thuse ho boela re amohela lehlohonolo la ho rongwa tshimong ya Lentswe la hae jwaleka Jonase.

Amen.

BALA: NUMERI 21:4–9

TEMANA: 8,9

- (8) *YABA JEHOVA O RE HO MOSHE: E TSA NOHA E TJHESANG, O E FANYEHE SEFATENG E MONG LE E MONG YA LOMILWENG, YA TLANG HO E TADIMA, O TLA PHELA.*
- (9) *MOSHE A E TSA NOHA KA KOPORO, A E FANYEHA SEFATENG, MME E MONG LE E MONG YA LOMILWENG KE NOHA, HA A TADIMA NOHA YA KOPORO O NE A PHELA.*

Setjhaba sa Modimo sa Iseraele ha se ne se nkile leeto la ho ya Kanana, lefatsheng la phallo, leeto ebile le letelele, hoo ba bileng ba tshwarwa ke mokgathala, mefaho ya ba fella, lenyora le lona la ba tshwara, maoto a bona a ruruha. Yaba ba qala jwale hoba le dipelaelo tse ngata, ka Modimo le ka Moshe.

DINOHA TSE TJHESANG.

Re tla hlahloba dintlha tse pedi hloohong ena ke:

- (1) *DIBE TSA SETJHABA SA ISERAELE LE,*
(2) *MOHAU WA MODIMO.*

(1) DIBE TSA SETJHABA SA ISERAELE

Modimo o ile wa ntsha setjhaba sa Iseraele Egepeta moo ba neng ba sotleha teng tlasa puso e mpe ya bokgopo ya Faro, Morena wa Egepeta. Modimo o ile wa tshedisa setjhaba sa ba-Iseraele lewatlang le lefubedu, ba tsamaya moo ho omileng. Yare ha Faro a romela masole a hae ho ba thiba hore ba se ke ba tshela lewatle le lefubedu ho ya Kanana lefatsheng leo ba le baletsweng. Modimo o ile wa etsa hore masole a Faro a wele bodibeng ba lewatle. Ka mokgwa o jwalo, yaba Modimo o namoletse ba-Iseraele ho masole a Faro, ka ho ba thusa ho ba hlolela ntwana, ha masole a Faro a ne a ba phalletse hore ba se tshela lewatle le lefubedu. Ho ya kamoo Modimo o ba thusitseng kateng, ba ne ba tshwanetse ho leboha Modimo. Empa re hlokometse hore ha ba ka etsa jwalo.

Ka lebaka la ditsietsi tse ileng tsa ba hlahela ha ba ntse ba hahlaula lefeelleng la mahwatata, tseleng ya ho leba Kanana, yaba ba lebala Modimo, ba tlelwa ke boipelaetso bo bongata. Re tla qolla ditsietsi tse kang tsena tse tharo, leha ho ntse ho bontshahala hore mohlomong tse ding di ne di ka nna tsa eba teng. Ditsietsi tse kang:

- (a) Tlala – mefaho ya bona e ile ya fella.
(b) Lenyora – metsi a ne a le siyo mahwatateng moo ba neng ba tsamaya teng.
(c) Ho kula – maoto a bona a ile a ruruha ka lebaka la botelele ba leeto ho ya Kana.

DITSIETSI LE MATHATA A TSELA

Ka lebaka la ditsietsi le mathata a ba hlahetseng tseleng, a kang a mang a tshwanang le ao re seng re a boletse, setjhaba sena sa Modimo sa ba-Iseraele, yaba se se se fetohela Modimo le Moshe. Ba ile ba bua hampe ka Modimo le mohlanka wa wona Moshe. Yaba ba re: "LE NE LE RE NTSHETSANG EGEPETA, HORE RE TLO SHWELA MONA FEEELLENG NA? HOBANE MONA, HA HO BOHOBE, HA HO METSI, MME PELO TSA RONA DI TENNWE KE BOHOBE BONA BO SA TSEBISAHALENG" (NUMERI 21:5).

Phutheho ya Modimo, kea tshepa hore taba ena eya utlwahala, hobane ke nnete. Le mehleng ena ya rona, Modimo o re thusa ditsietsing tse ngata le mathateng a mangata a re hlahelang, a kang: Tlala, lenyora le malwetse ha re kula ke mahloko a hlolang dingaka a mefutafuta. Modimo o ntse o re arabela dithapelo tsa rona, leha re le baetsa-dibe, o ntse o re hauhela, o re tshwarela dibe tsa rona. O ntse o re thusa dinthong tseo re ka etsang letoto la ho di bolela le ho tsona tseo re ka sitwang ho di bolela.

Modimo o lebeletse ho rona bao re leng bakgethwa ba hae kajeno, ka mantswe a mang balseraele ba kajeno hore re mo rapele re lebohe:

- (a) *Bophelo.*
- (b) *Dijo* – tseo a re fang tsona letsatsi le letsatsi, kamehla hore re se ke ra bolawa ke *tlala*.
- (c) *Metsi* – Modimo o re thusa ka metsi hore lenyora le se ke la re kgama la re bolaya.
- (d) *Malwetse* – Ha re kula ke malwetse a mefutafuta a hlolang dingaka tsa rona. Modimo o ntse a re phekola a re fa bophelo.

Dibe tsa setjhaba sa Modimo sa Iseraele re bontshitswe ha ba tshwanetse ho mo leboha Modimo o ba thusitse ka ho ba ntsha Egepeta tlasa puso e mpe ya Faro le ho ba pholosa lewatlang le lefubedu, ho le tshela ba tsamaya mobung o omileng, le ho tebisa masole a Faro a ba phalletseng. Ha ba ka ba leboha Modimo. Empa ka lebaka la ditsietsi tse ba hlahetseng tseleng leetong la ho ya Kanana ba ile ba bua Modimo le Moshe hampe. Ba nyefola.

Re tla tadima jwale kotlo ya Modimo ka baka la dibe tsa setjhaba.

KOTLO YA MODIMO KA BAKA LA DIBE

Modimo o ile wa utlwa bohloko ka lebaka la dibe tsa ba-Iseraele, wa romella setjhaba kotlo ya dinoha tse tjhesang jwaleka mollo. Dinoha tsa loma. Ba bang ba tswa maqeba. Babang ba shwa. Dinoha tsena tse tjhesang di ile tsa tlisa lefu ho setjhaba sa Iseraele, jwaleka ha lentswe la Modimo le bolela hore moputso wa sebe ke lefu (Baroma 6:23). Balseraele ha ba se ba bona hore ba shwa ka bongata, le hore lefu ke kobo ba-anela le ba aparetse, ba ile ba inyatsetsa dibe tsa bona, ba di swabela. Ba kopa Moshe ho ba rapella ho Modimo. Re tla tadima jwale ntlha ya bobedi e leng:

MOHAU WA MODIMO

Moshe o ile a rapella setjhaba ho Modimo hobane se ne se kopile ho tshwarelwa dibe, mme se inyatseditse dibe tsa sona. Modimo o ile wa arabela thapelo ya Moshe wa re ho Moshe: "ETSA NOHA E TJHESANG, O E FANYEHE SEFATENG, E MONG LE E MONG YA LOMILWENG, YA TLANG HO E TADIMA O TLA PHELA" (NUMERI 21:8).

Phutheho ya Modimo, re hlaosetswa hantle Lentsweng la Modimo hore noha e fanyehilweng sefateng e tshwantsha Jesu Krete Mora Modimo ya ileng a fanyehwa sefapanong Golgotha

hore ba dumelang ho yena, ba tle ba tshwarelwe dibe tsa bona. Ha re tadima Lentsweng la Modimo ho Evangedi ho ya ka (Johanne 3:14,15) re utlwa mantswe ana: *“MME JWALEKA HA MOSHE A NE A FANYEHA NOHA FEELLENG MORA MOTHO E KA KGONA A FANYEHWE JWALO, HORE E MONG LE E MONG YA DUMELANG HO YENA A SE KE A TIMELA, A MPE A BE LE BOPHELO BO SA FELENG.”*

Morena Jesu o ne a bua le Nicodema. Jwaleka ha noha e sefateng e ile ya tlisetsa setjhaba sa Iseraele pholoso,ho jwalo, phutheho ya Modimo. Moetsadibe e mong le e mong, ya tadimang Jesu Mora Modimo sefapanong ka tumelo o tla pholoswa dibeng tsa hae, hape-hape leha a mo tadima teroneng ya hae lehodimong. Phutheho ya Modimo jwaleka ha re se re bontshitswe kamoo dibe tsa setjhaba sa Modimo sa Iseraele di ileng tsa tlisa lefu la dinoha tse tjhesang jwaleka mollo ho jwalo feela le kajeno, dibe tsa moetsadibe ho Modimo, di tlisa lefu le sa feleng.

Mohau o moholo wa Modimo ho baetsa-dibe ke hore Jesu Krete ke Mopholosi wa rona. Ka tumelo ho Jesu Krete, tumelo e nang le mesebetsi e metle, re na le tshepo ya ho kena bophelong bo sa feleng, boo Modimo o bo baletseng bohle ba ikokobetsang jwaleka bana ba banyenyane.

Le rona re setjhaba sa Modimo se pholositsweng dibeng ka madi a Jesu Krete a tsholohileng sefapanong hore e mong le e mong ya dumelang ho yena, a tle a fumane bophelo bo sa feleng. Jesu Kretse o re pholositse ditsietsing tse ngata bophelong ba rona lefatsheng. Ha re mo rapeleng, re leboheng pholoso yeo, le melemo yohle yeo a re etseditseng yona lefatsheng. Dintho tseo re di bonang, le tseo re sa di boneng. Tseo re di utlwisisang le tseo re sa di utlwisiseng. Morena a ke a re thuse ho leboha Jesu Krete.

Amen.

BALA: MATTHEU 27:3–10

TEMANA: 4,6,8

- (4) *“KE SITILWE, HA KE EKILE MADI A SENANG MOLATO”*
- (5) *BAPRISTA BA BAHOLO BA NKA DITJHELETE, BA RE HA HWA TSHWANELA HORE DI KENNGWEPOLOKELON YA TEMPELE, HOBANE KE THEKO YA MADI.*
- (8) *KA BAKA LEO, TSHIMO YEO E BITSITSWE TSHIMO YA MADI HO FIHLELA KAJENO.*

Ditemana tseo re di badileng re bolellwa ka boinyatso ba Judase Iskariota, e mong wa barutuwa ba Morena Jesu Krete. O inyatsetsa sebe sa hae sa ho eka Morena Jesu Krete, ho mo nehela dira tsa hae, baprista ba baholo le bangodi ba neng ba batla ho mo bolaya. Hlooho ya ditaba tsa rona re tla bona ka: (1) Sebe sa lerato la tjehelete sa Judase Iskariota.

Ntlha ya pele hloohong ena re bona: (a) Ha Jesu a rekilwe ka tjehelete.
(b) Boinyatso ba Judase Iskariota.

(A) MORENA JESU O REKILWE KA TJHELETE

Ha re tadima bophelo ba Judase Iskariota, yena ya ileng a nehela ka Jesu Krete ho dira tsa hae e leng baprista ba baholo le bangodi. Re fumana e le motho ya neng a rata tjehelete ka ho fetisisa dintho tse ding tseo a neng a e-ena le tsona. Evangeding ho (Johanne 13:29) o hlalosa ha e ne e le ramatlotlo, a e-na le mokotlana wa ditjehelete. Hape, hona ho (Johanne 12:6) o hlalosa a e-na le mokotlana wa ditjehelete, empa hape, ebile e le leshodu. O na a inkela se kenngwang mokotlaneng ona wa ditjehelete. Maria kgaitsemi ya Lasaro mane Bethania, o ile a tlotsa Morena Jesu ka setlolo se theko e thata, ntlo yaba ya tlala monkgo wa setlolo seo se theko e phahameng.

Ke Judase Iskariota ya itseng ho ka be ho le molemo ha setlolo se ne se rekisitse dedinare tse makgolo a mararo tsa newa bafumanehi. Tlhaloso e re: O ne a bua jwalo, eseng hobane a ne a hlokomela bafumanehi empa, hobane e ne e le leshodu. Diketso tse na tsa Judase Iskariota di supa sebe sa lerato la tjehelete. O tsamaya le Jesu Mora Modimo, ke morutuwa wa hae empa, dinthong tse ngata tsa bohlokwa, yena o inahanela ka ho tlatsa mokotla wa hae tjehelete. Qetellong lerato la Judase Iskariota la tjehelete le entse hore a ye ho baprista ba baholo le bangodi a re ho bona:

“LE TLA NNEANG KE TLE KE LE NEHELE YENA” (MATTHEU 26:15). Yaba ba rera ho mo fa ditjehelete tse mashome a mararo a silifera. Hona ke bona bopaki ba hore Jesu Mora Modimo o rekilwe ka tjehelete.

Sebe sa Judase Iskariota sa lorato la tjehelete, o qeteletse a rekisitse Morena Jesu Krete. Puo ya bahlalefi e tlwaellehileng e re: *TJHELETE KE MOHLODI WA BOBE BOHLE.* Lentswe la Modimo ho Baroma 6:23 le re: *“HOBANE MOPUTSO WA SEBE KE LEFU, EMPA NEO YA MOHAU WA MODIMO KE BOPHELO BO SA FELENG”* Re tla tadima jwale kamoo sebe sena sa Judase Iskariota sa lerato la tjehelete sebileng sa fetoha lefu kateng.

Phutheho ya Modimo, tjehelete rea e rata e re phedisa dinthong tse ngata. Bophelo kantle ho tjehelete bo ka ba boima ho rona lefatsheng. Re tshwantsha *tjehelete le bohobe* bo thibelang hore tlala e se ke ya re bolaya ya tlisa lefu. Morena Jesu ha a hlola SATANE ho MATTHEU 4:4 o re: *MOTHO A KE KE A PHELA KA BOHOBE FEELA, EMPA O TLA PHELA LE KE POLELO TSOHLE TSE TSWANG MOLOMONG WA MODIMO*. Le ho tjehelete ho ntse ho le jwalo. Dipolelo di tla re phedisa tsa Modimo. Jwale re tla tadima ka (b) Boinyatso ba Judase Iskariota.

(B) BOINYATSO BA JUDASE ISKARIOTA

Judase Iskariota ya ileng a susumetswa ke sebe sa ho rata tjehelete, o rekisitse Morena Jesu Krete ho baprista ba baholo le bangodi, bona ba neng ba batla ho bolaya Morena Jesu, yaba o re ho bona: *LE TLA NNEANG, KE TLE KE LE NEHELE YENA?* (Mattheu 26:15). Jwale o inyatsetsa sebe sa hae o re: *“KE SITILWE, HA KE EKILE MADI A SENANG MOLATO”*. O bua jwalo ha a busetsa ditjehelete ho baprista le ho bangodi. O lahlela ditjehelete fatshe tempeleng. Ha di sa mo thabisa, ha a sa kgotsofatswa ke tsona.

Ditjehelete tsa tjo tjo tsa moputso wa bokgopo tseo a di filweng ha a rekisa Morena Jesu ha a sa thabiswa ke tsona, ha di sa mo kgotsofatsa, dia mo swabisa. Moapostole Petrose o hlahosa bukeng ho Diketso 1:18 o re: Judase yeo e bileng motsamaisi wa ba tshwereng Jesu, o itheketsa tshimo ka tjehelete ya moputso wa bokgopo. Lebitso la tshimo yeo ke: *“HAKALDAMA” TSHIMO YA MADI*. Baprista ba baholo le bangodi ha ba ntse ba thonaka ditjehelete tse lahletsweng fatshe tempeleng ba re: Ha hwa tshwanela hore di kenngwe polokelong ya tempele, hobane ke theko ya madi. Phutheho ya Modimo, re hlokometse hore sebe sa lerato la tjehelete se qeteletse se tlisitse lefu, ha mokreste a sa batle mmuso wa Modimo le ho loka ha wona pele. Mohlala o motle ke Judase. Sebe ha motho a etsa hore Judase Iskariota a rekise ka Morena Jesu Krete. Moputso wa sebe ke lefu.

O qeteletse a inyatsetse sebe sa hae. Empa, jwale ka baka la sona sebe a iphenetha. A ipolaya, a itihela fatshe, a phatloha mpa ka lehare, mala a hae a horometseha kaofela ka lebaka la sebe sa hae. Ho etsahetse se boletsweng ke moapostole Pauluse bukeng ho (Baroma 6:23) *“HOBANE MOPUTSO WA SEBE KE LEFU EMPA NEO YA MOHAU WA MODIMO KE BOPHELO BO SA FELENG”*. Ha re inyatsetsa dibe tsa rona, re hopoleng hore Jesu Mora Modimo o fanyahehilwe sefapanong Golgotha ka lebaka la dibe tsa rona.

Ke yena Morena Jesu Krete ya reng ho rona: *KA NNETE KE RE HO LONA: “HA LE SA FETOHE, LA BA JWALEKA BANA, HA LE KA KE LA KENA MMUSONG WA MODIMO. “BAKANG, BAKANG” mekgweng ya lona e sa lokang, e kgopo. Morena a re thuse ho inyatsetsa dibe tsa rona, re sa ntse re filwe sebaka sa ho phela lefatsheng.*

Amen.

BALA: MATTHEU 16:13–26

TEMANA: 18,23

HAPE, KE RE HO WENA, O PETROSE, MME KA HODIMA LEJWE LEO, KE TLA HAHA KEREKE YAKA, MME DIKGORO TSA TSA NQALO YA BAFU HA DI KA KE TSA E HLOLA (Mattheu 16:18). JESU A RETELEHA, A RE HO PETROSE: “TLOHA HO NNA, SATANE, O KGOPIISO HO NNA, HOBANE HA O UTLWE TSA MODIMO, O UTLWA TSA BATHO FEELA” (MATTHEU 16:23). Moo re badileng teng re hlokomela ka dintlha tse pedi tse sa tshwaneng ka motho a le mong e leng: PETROSE. Hlooo ya ditaba tsa rona re bona Petrose ya entsweng TSHIYA YA KEREKE YA MORENA JESU A IPHETOLA LEJWEHADI LE LEHOLO LE THIBELANG KEREKE YA JESU HO TSWELA-PELE.

Re tla tadima dintlha tse pedi hloohong ena:

- (a) PETROSE HA E LE TSHIYA YA KEREKE LE
- (b) PETROSE HA A IPHETOLA TSHIYA YA LEJWEHADI LE THIBELANG KEREKE HO TSWELA-PELE.

(A) PETROSE HA E LE TSHIYA YA KEREKE.

Mane Sesarea wa Fillippi ha kereke ya Morena Jesu e thewa e hlongwa, kereke ya selekane se setjha, Morena Jesu o re ho PETROSE: “*O PETROSE, MME HODIMA LEJWE LEO, KE TLA HAHA KEREKE YAKA, MME DIKGORO TSA NQALO YA BAFU HA DI KA KE TSA E HLOLA.*”

Morena Jesu Krete o ile a ruta barutuwa ba hae hore ba bolelle batho hore ke Mora Modimo o phelang. Ke ka lebaka leo a ba botsang ditemaneng tsa 13 le 14,15, hona kgaolong ena ya 16 hore: Ke le mora motho, batho ba re ke mang na? Mme lona, le re ke mang na? Ke ha Simone Petrose a tla araba mme a arabella barutuwa bohle are: “*O KRESTE MORA MODIMO O PHELANG.*”

Petrose o arabetse ka boipolelo bo botle bo hlwekileng, bo pakang hore seo a se buileng o se kwaholletswe ke Moya o Halalelang. Ke ha Morena Jesu a tla re ho yena hammoho le ho barutuwa ba bang:

“O lehlohonolo Simone mora Jona, hobane hase nama le madi a ho kwaholletseng hoo, empa e le Ntate ya mahodimong” (Mattheu 16:17). Hape ke re ho wena, “*O Petrose, mme kahodima lejwe leo, ke tla haha kereke ya ka, mme dikgoro tsa nqalo ya bafu ha di ka ke tsa e hlola.*”

Mantswe ana a bolela hore Petrose, hammoho le barutuwa ba bang ke lefika la motheo leo Morena Jesu a le kgethileng ho haha kereke ya hae. Ke ka lebaka leo baapostola ka boipolelo ba bona bo botle, e leng motheo moo Morena Jesu a ahileng phutheho ya hae. Ke lona lebaka leo ntlheng ya rona ya pele Petrose a bitswang: *TSHIYA YA MOTHEO WA KEREKE*. Baratuwa Moreneng, le kajeno mehlang ena ya rona, ho sa ntse ho tshwana le mehla yeo ya Sesarea wa Fillipi ha kereke ya selekane se setjha e hlongwa.

Modumedi e mong le e mong, baruti baholo le bahlanka le rona re ba bitsitsweng, hoba baprofeta le baprista le marena. Re bitseditse hoba tshiya kapa mafika a motheo wa kereke ya Morena Jesu, ho e haha le hore dikgoro tsa nqalo ya bafu di se ka tsa e hlola. Le rona re entse boipolelo bo botle ba tumelo ya bakreste. Ha re fetoheng ditene tse phelang tse hahang kereke ya Morena Jesu hore e tiye ka ho sa feleng. Ditsokotsane le difefo tsa diabolose lefatsheng di tle di se ke tsa e diha, ka meya e mebe.

Ha re boleleng le hona ho phatlalatsa Evangedi, ha ho tshwaneleha le ha ho sa tshwanelehe. Re tla tadima jwale ntlha ya bobedi ha:

(B) PETROSE A IPHETOLA LEJWEHADI LE THIBELANG KEREKE HO TSWELA-PELE

Petrose mothating ona re mo bona a sebedisa pitso ya hae e haleleleng ka mokgwa o fosahetseng. Mane Sesarea wa Fillipi ha kereke ya Morena Jesu e ntjha e hlongwa ya selekane se setjha, PETROSE O ENTSWE TSHIYA YA MOTHEO WA KEREKE, yena hammoho le baapostola ba bang. Ha Morena Jesu a tla bua mantswe ana ho Petrose temaneng ya (MATTHEU 16:23)

“TLOHA HO NNA, SATANE O KGOPIISO HO NNA, HOBANE HA O UTLWE MODIMO, O UTLWA TSA BATHO FEELA” (MATTHEU 16:23).

E ne e le ha Morena Jesu a qeta ho bolella Petrose hammoho le barutuwa ba bang hore eka kgona a ye Jerusalema, a utlwiswe bohloko bo boholo ke baholo le ke baprista ba baholo le bangodi, mme a bolawe, a ntoo tsoha ka letsatsi la boraro. Petrose o itse ho Morena Jesu: *“MORENA O IKUTLWELE BOHLOKO, TSE JWALO DI KE KE TSA HLAHELA” (MATTHEU 16:22).*

Morena Jesu o ne a rutila barutuwa ba hae hore hwa hlokahala hore a shwe, a be a tsohe lebitleng ka letsatsi la boraro. O ne a ba boleletse le ka mahlomola a hae ohle a tshwanetseng ho mo hlahela. O ne a sa rate hore ba mo tsebe e le Mopholosi feela, ya bitswang Krete. Petrose o ne a sa utlwisise. O ne a bona Morena Jesu e le Messia feela, ya tlleng ho pholosa ba-Juda ho baRoma. One a sa rate ho utlwisisa hore Jesu o tla thakgiswa, a shapuwe, a tshwelwe ka mathe. A etswe bokgopo bohle. Haele Morena Jesu o ne a ba bolella dinnete tsa dintho tse tlang ho etsahala ho yena le mosebetsi wa hae lefatsheng, e le hore hamorao ba tle ba tsebe ho mo paka ba sena dihlong, le ho bolella Evangedi ya kgotso e pholosang lefatsheng

Phutheho ya Modimo, Morena Jesu o ne a tshwanetse ho shwa, e le hore kereke ya bakgethwa e tle e hlwekiswe, e lokiswe pela Modimo ka madi a hae a tsholohileng sefapanong, Golgotha. Bolebadi ba Petrose bo tshwana le bolebadi boo re ka reng ke ba boiketsiso. Ke kamoo re bonang hore o iphetotse lejwehadi le thibelang kereke ya Morena Jesu ho tswela pele. Re utlwisisa hantle jwale ka diphoso tsa Petrose le mantswe a Morena Jesu ha a re ho Petrose *"Tloha ho nna Satane, o kgopiso ho nna, hobane ha o utlwe tsa Modimo, o utlwa tsa batho feela"*

Baratuwa Moreneng, ha re hlokomeleng hore Morena Jesu o rata ho haha kereke ya hae ka bophelo bo botle ba modumedi e mong le e mong, haele Satane o sebedisa le bona ba dumetseng ho senya mosebetsi wa kereke ya Jesu ho e thuba. Lerato la Petrose ho Morena Jesu e ne e le la mokunyata, e ne e se la nnete, hwa bonahala hore Satane o ne a mo kgomaretse, ka motsotso oo.

Baratuwa Moreneng, ha re dumeleng ho Jesu Krete hobane o re entse tshiya ya motheo wa kereke ya hae lefatsheng. Re entse boipolelo bo botle ba tumelo kerekeng ya Jesu Krete. Re

amohetswe, re kolobeditswe, re ja Selallo se Halalelang. Ha re se keng ra kwenehela Jesu Kreste ka ho ba mokgoba a sebe. Ha re rapelleng kereke ya Jesu Kreste ho tiya lefatsheng. Morena a re thuse ho etsa jwalo.

Amen.

BALA: JOHANNE 21:15–22

TEMANA: JOHANNE 21:15–17

- (15) *YARE HOBANE BA QETE HO JA, JESU A RE HO SIMONE PETROSE: “SIMONE, MORA JONA A O NTHATA HAHOLO HO FETA BANA NA”? A RE HO YENA: “E, MORENA O TSEBA HOBA KEA O RATA”. JESU A RE HO YENA: “ALOSA DIKONYANA TSA KA”*
- (16) *A RE HO YENA LA BOBEDI: “SIMONE, MORA JONA A O NTHATA NA? A RE HO HO YENA: “E MORENA O TSEBA HOBA KEA O RATA” JESU A RE HO YENA: DISA DINKU TSA KA”*
- (17) *A BA A RE HO YENA LA BORARO “SIMONE, MORA JONA A O A NTHATA NA? PETROSE A SWABA KA HOBANE A BILE A MMOTSA LA BORARO, A RE A O A NTHATA NA? A RE HO YENA A MORENA O TSEBA TSOHLE, O TSEBA HOBA KEA O RATA” JESU A RE HO YENA: “ALOSA DINKU TSA KA”*

Taelo ya Morena Jesu ho Petrose ka makgetlo a mararo ke ena:

- (a) *“ALOSA DIKONYANA TSA KA”*
(b) *“DISA DINKU TSA KA”*
(c) *“ALOSA DINKU TSA KA”*

Hlooho ya ditaba tsa rona ke ena: MORENA JESU O LAELA BA DUMELANG HO YENA HORE BA ALOSE MOHLAPE WA HAE WA DINKU.

NTLHA YA PELE (a). Re tla tadima ka DIPOTSO LE DIKARABO TSE BOTSWANG PETROSE

Ntlheng ya bobedi (b) Re utiwa TAELO HO PETROSE

Petrose yeo re mo tsebang e le e mong wa barutuwa ba Morena Jesu ya kileng a latola Morena Jesu pepeneneng hararo pele a thakgiswa, yaba o re: *“MONNA ENWA HA KE MO TSEBE”* yaba mokoko wa lla. Re tseba kamorao ho moo, o ile a swabela sebe sa hae. Ditemaneng tseo re di badileng re hlokometse hore Morena Jesu o ne a se a mo tshwaretse dibe tsa hae, mme o mo buseditse ditulong. Jwale Morena Jesu o mo botsa dipotso tse tharo hore a di arabele, kahobane a ne a mo hlomamisa mosebetsing o moholo wa bodisa ba dinku. O botswa mabapi le tumelo le lerato la hae ho Jesu Kreste.

Dipotso tse tharo tseo Petrose a di botsitsweng ke tsena tse latelang:

- (I) *“SIMONE, MORA JONA A O A NTHATA NA? KARABO KE: “E MORENA, O A TSEBA HOBA KEA O RATA”*
- (II) *PETROSE, o ile a botswa potso ya bobedi e ntseng e tshwana le ya pele. KARABO: Karabelo ya hae le yona, e ile ya nna ya tshwana le ya pele.*
- (III) *POTSO: ya boraro ya MORENA JESU HO PETROSE e ile ya nna ya tshwana leya pele le ya bobedi ka mokgwa ona:*

POTSO: *SIMONE MORA JONA, A O A NTHATA NA?*

KARABO: Karabelo ya Petrose le yona e ile ya nna ya tshwana le dikarabelo tse pedi tseo a seng a di entse :

“MORENA, O TSEBA TSOHLE, O TSEBA HOBA KEA O RATA”

Petrose o entse boipolelo ba tumelo le lerato la hae ho Jesu Kreste ka makgetlo a mararo pele a newa mosebetsi o moholo wa tlhomamiso ya hoba MODISA WA DINKU LE DIKONYANA. E ne e le kamorao hore a botswe dipotso mme a di arabele. Ka makgetlo ana a mararo, Petrose o amohela MORENA JESU e le MORENA wa hae, yeo a mo ratang, mme a dumelang ho yena (Johanne 21:15-17). Athe pele, PETROSE o ne a ile a latola Morena Jesu hararo a re ha a mo tsebe, yaba mokoko o a lla (Johanne 18:17,25 le 27).

Re tla kena jwale ho NTLHA YA BOBEDI (B0) TAELO YA MORENA JESU HO PETROSE.

Ka makgetlo a mararo, MORENA JESU o ile a laela PETROSE ka mokgwa ona:

- (a) *“ALOSA DIKONYANA TSA KA”*
- (b) *“DISA DINKU TSA KA”*
- (c) *“ALOSA DINKU TSA KA”*

Taelo ena ya MORENA JESU KRESTE HO PETROSE, ha re e hlahlobisa re fumana hore hantle-ntle e bua ka dihlopha tse tharo ka hara kereke, e leng:

- (a) BANA BA BANYENYANE
- (b) BATHO BA BATJHA (BAHLANKANA LE BARWETSANA)
- (c) BATHO BA BAHOLO (BO-MME LE BO-NTATE)

Phutheho ya Modimo e ratehang, jwaleka ha hlohoo ya ditaba tsa rona e bolela hore: MORENA JESU KRESTE O LAELA BA DUMELANG HO YENA.

PETROSE, o ile a dumela ho MORENA JESU KRESTE. O arabetse dipotso ka makgetlo a mararo ha MORENA JESU a re: *“SIMONE MORA JONA, A O A NTHATA NA”?* O RE: *“E, MORENA O TSEBA HOBA KEA O RATA”* Le rona re ba dumetseng ho Morena Jesu Kreste. Re kolobeditse, re amohetswe, re ba atamelang SELLALO SE HALALELANG SA MORENA. Jwaleka Petrose re entse boipolelo ba tumelo ka kerekeng. Re botsitswe dipotso mabapi le tumelo ya rona le lerato ho JESU KRESTE.

Karabelo ya rona ebile e hlakileng, e totobetse. Re ne re sa bontshe ho qeaqeya ha re arabela dipotso. Re amohetse MORENA JESU ka pelo, moya le nnete. Re itse MORENA JESU rea mo rata, ke MOPHOLOSI WA RONA. Lentswe la Modimo le a re kgothatsa, le re: re ba hauhetsweng, ka tumelo ho Jesu Kreste, re ba tshwaretsweng melato ya rona. Re buseditse ditulong tsa rona. Re entswe baporofeta, marena le baprista.

Taelo yeo re e newang ke ena:

- (a) *“ALOSANG DIKONYANA TSA KA”*

Ka mantswe a mang re laelwa ho hlokomela thuto ya BIBELE ho bana ba banyenyane. THUTO HO BANA BA SELEKANE KAPA HO BAO ESENG BA SELEKANE (SUNDAY SCHOOL).

Taelo e tswela-pele e re:

(b) "DISA DINKU TSA KA"

Ka mantswe a mang re laelwa ho hlokomela: (THUTO YA KATEKISIMA) ho (BATHO BA BATJHA) (Bahlankana le barwetsana)

Taelo e tswela-pele hape e re:

(c) "ALOSA DINKU TSA KA"

Mona re hlokomediswa haholo ka: THUTO YA LENTSWE LA MODIMO e leng: BIBELE HO BATHO BA BAHOLO.

Mokgwa o batlang o le bonolo wa ho tshwara: THUTO YA BIBELE ho batho ba baholo ke o tlwaelehileng wa TJHAKELO YA MALAPA kapa HUISBESOEK KAPA HOME VISITATION. Mona re ka hlahloba lelapa lohle, ba baholo le ba banyenyane. Kgaolo e itseng Bibeleng e ka balwa, ya e-ba thapelo, le tse ding jwalo-jwalo. Baratuwa Moreneng, ena ke yona kano yeo bohle ba dumetseng ho Jesu Krete ba tshwanetseng ho e nka le ho e phetha. Ke taelo yeo PETROSE a e amohetseng. Ke taelo yeo le rona bohle re tshwanetseng ho e amohela le ho e phetha.

MORENA JESU O RE: "KE NEILWE BORENA BOHLE LEHODIMONG LE LEFATSHENG, E YANG KE HONA. LE RUTE DITJHABA TSOHLE, BA DUMELANG LE BA KOLOBETSE KA LEBITSO LA NTATE, LE LA MORA, LE LA MOYA O HALALELANG, MME LE BA RUTE HO BOLOKA TSOHLE, TSEO KE LE LAETSENG TSONA MME, BONANG, NNA KE NA LE LONA KAMEHLA YOHLE HO ISA BOFELONG BA LEFATSHE.

Morena a ke a re thuse ho amohela taelo le ho e phetha.

Amen.

BALA: LUKA 24:1–8
TEMANA: 5,6

YA PHELANG LE MMATLELANG HARA BAFU? HA A YO MONA, EMPA O TSOHILE HOPOLANG KAMOO A LE BOLELETSENG KATENG, HA A SA LE GALALEA.

Hlooho ya ditaba tsa rona ditemaneng tseo re di badileng ke hore: “*JESU KRESTE O TSOHILENG BAFUNG*” Hloohong ena re bona:

- (a) TUMELO E FOKOLANG YA BASADI BAO JESU A BA BOLELETSENG HORE O TLA TSOHA KA LETSATSI LA BORARO hape.
- (b) Re tla tadima ntlha ya bobedi e leng: “*MATSHEDISO A TLISWANG KE MANTSWE A MANGELOI*”.

(a) TUMELO E FOKOLANG YA BASADI.

Morena Jesu Krete o ne a tsebisitse baruwa ba hae esita le bona basadi ba neng ba dumetse ho yena hore o tla kena lebitleng mme o tla tswa ho lona ka letsatsi la boraro. Basadi ha ba itsise dinoko tseo ba lokisetseng lebitleng, ba fumana lejwe le phikolositswe lebitleng. Setopo sa Jesu se le siyo. Ba ile ba tsieleha ba tshoha haholo. Yaba ba bona banna ba babedi pela bona ba apereng diaparo tse phatsimang. E ne e le mangeloi. Yaba ba re ho bona: “*YA PHELANG NA LE MMATLELANG HARA BAFU? HA A YO MONA, EMPA O TSOHILE. HOPOLANG KAMOO A LE BOLELETSENG KATENG HA A SA LE GALALEA.*”

Potso ya mangeloi ho basadi e bontshitse hore tumelo ya bona ya fokola, e nyenyane. Morena Jesu o ne a boleletse bohle ba dumetseng ho yena hore ke MORA WA MODIMO. O NEILWE matla wohle lehodimong le lefatsheng. Matla a hae o a bontshitse ka ho tsosa bafu le ho hlola lefu.

(I) O TSOSITSE MORADI WA JAIRUSE LEBITLENG. A RE:

NGWANANA KE RE HO WENA TSOHA. Yaba ngwanana wa tsoha.

(II) HAPE O TSOSITSE LASARO LEBITLENG a le matsatsi a mane a shwele.

(III) A boela a phedisa mora wa mosadi wa mohlolohadi.

Matla a Jesu hodima lefu a bonwe. Leha ho le jwalo, ha ditaba tsena di se di etsahala, ba ile ba di lebala. Phutheho ya Modimo, ha re hopoleng hore mehleng ena ya rona, ho na le badumedi ba batlang Morena Jesu moo ba sa tshwanelang ho mo batla teng. Ba batla Jesu maruong a lefatshe lona moo ho seng thapelo. Ba mo batla mapatlelong a boithabiso, moo lebitso la hae le sa phatlalatsweng teng. Re utlwisisa ke hona potso ya mangeloi e reng:

(a) “*YA PHELANG LE MOBATLELANG HARA BAFU NA? O TSOHILE, HA A YO MONA.* Re bontshitswe ka tumelo e fokolang ya basadi. Re tla tadima jwale ntlha ya bobedi e reng:

(b) "MATSHEDISO A MANTSWE A MANGELOI ho basadi ke a reng: "JESU O TSOHILE BAFUNG WA PHELA. O HLOTSE SATANE, LEFU LE LEBITLA.

Le hoja basadi ba ne ba swabile ha ba e-ya lebitleng ba tseba ha Jesu a shwele. Jwale ba thabile, ba tshedisehile, ba ikutlwa ba e-na le matla hobane Jesu o tsohile lebitleng wa phela. Morena Jesu o ne a ba boleletse pele ho diketsahalo tsena, empa ba ile ba e-ba le bolebadi bo tshwanang le ba boiketsiso. Phutheho ya Modimo, mehleng ena ya rona re ipotsa hore na:

HO TLA JWANG HORE BATHO BA dumetseng ho Jesu Krete ba le bale ka Jesu ya shweleng lefu le lebe la thohako, lefu la ho fanyehwa sefapanong, e le hore bohle ba dumelang ho yena, ba tle ba se ke ba timela, ba tle ba hauhelwe, ba tshwarelwe dibe tsa bona. Ba kentshwe bophelong bo sa feleng. Tebalo ena e bakwa ke eng? Batho ba ka lebala: jwang Jesu ya hlotseng Satane, lefu le lebitla.

Baratuwa Moreneng, Morena Jesu Krete, kajeno o re tsosa lebitleng la sebe. O re tsoetsa bophelo bo sa feleng o tsohile lebitleng. O tla re tsosa lebitleng. Ke yena thaka-ngwaha ya ba robetseng. Ke ka lebaka leo banna ba kang bo-Pauluse ba itseng: "*LEFU TSENENE YA HAO E KAE NA? WENA LEBITLA HO HLOLA HA HAO HO KAE NA?*

Bopaki ba hore Jesu Krete o tsohile bafung, o ile a itl'hahisa ho (I) MARIA MAGDALENA, le ho (II) BASADI BA GALELIA le ho (III) BAETI BA EMMAUSE, le ho (IV) BARUTUWA BA HAE THOMASE A LE SIYO, le ho (V) BARUTUWA BA HAE THOMASE a le teng, le ho (VI) BAAPOSTOLA BOHLE. Morena a ke a re thuse hore tumelo ya rona ho Jesu Krete e ke e be tumelo ya nnete, e nang le mesebetsi e metle e pakang hore re ba dumetseng ho yena.

Amen.

BALA: LUKA 15:21–30
TEMANA: 21,30

- (21) NTATE ke sitetswe lehodimo le wena, mme ha ke sa tshwanelwa ho bitswa mora wa hao.
- (30) Empa enwa mora wa hao, ya jeleng letlotlo la hao kaofela le dinyatsi, ere a sa fihla, o mo hlabetse namane e nontshitsweng

(a) BOINYATSO BA NGWANA YA LEHLASWA

Ditemaneng tseo re di badileng, re bolellwa ka boinyatso ba ngwana ya lehlaswa ho Ntata`e. O re ho Ntata`e: "*Ntate, ke sitetswe lehodimo le wena, mme ha ke sa tshwanelwa ho bitswa mora wa hao*"

(b) TSHWARELANO YA MELATO

Thapelong yeo Morena Jesu Krete a re sietseng Evangeding ho ya ka Mattheu 6:1,12 re rutwa mantswe a reng: "O re tshwarele melato ya rona, jwaleka ha re tshwarela ba nang le melato ho rona"

Thapelo ha e tswela-pele ditemaneng tsa Mattheu 6:14 le 15 e re: "Hobane, ekare ha le tshwarela batho ditlolo tsa bona, Ntata lona ya mahodimong o tla le tshwarela le lona." Empa ekare ha le sa tshwarele batho ditlolo tsa bona, Ntata lona le yena a ke ke a le tshwarela ditlolo tsa lona.

Phutheho ya Modimo, ho kgalemelana ke ntho e tshwanetseng ho ba teng ho bana ba Modimo.

- (i) Ka malapeng a rona, {ii}Ka diphuthehong moo re sebeletsang Modimo teng le (iii) mesebetsing ya rona ha e mong a foseditse e mong kapa ba bang. Ha ya kgalemelwang ka tsela e tlwaelehileng ya se-Kreste, e leng ya Bibeletse a le manganga a sitwa ho itshwara kapa ho ikokobetsa, a sa amohele kgalemelo, kgato e ka nkuang kgahlanong le ya jwalo ke ya ho latela Bibeletse e leng ya Mattheu 18:15, e leng ya tshwarelo ya ditshito. Lebaka le lehlo la bohlokwa la molao wa kereke le tshwanetseng ho hopolwa ke lena:

(A) MATSHWAO A KEREKE YA NNETE KE:

- (a) TSHEBELETSE E HLWEKILENG YA LENTSWE.
(b) TSHEBELETSE E HLWEKILENG YA SELALLO.
(c) HO BOLOKA KOTLO YA KEREKE.

Ha ya kgalemelwang a inyatsetsa sebe sa hae jwaleka, ke lehlohonolo. Jwale re ka sebedisa thapelo yeo Morena Jesu Krete a re sietseng yona ho Mattheu 6:12,14 le 15: "*O re tshwarele melato ya rona, jwaleka ha re tshwarela ba nang le melato ho rona*". "*Hobane, ekare ha le tshwarela batho ditlolo tsa bona, Ntata lona ya mahodimong o tla le tshwarela le lona.*"

Ke lona lebaka leo Ntata ngwana ya lehlaswa a ileng a hauhela mora enwa wa hae a mo utlwela bohloko, a mo tshwarela dibe tsa hae a re: “mora enwa waka o ne a shwele, mme jwale o pholohile, one a lahlehile, mme jwale o boetse o fumanwe. Mme ba qala ho nyakalla (Mattheu 15:24). Ntata ngwana a etsa mokete wa thabo wa nyakallo. A hlaba namane e nonneng. A mo apesa seaparo se setle, se setelele. A mo rwesa le dieta maotong. Mosebetsi ona o motle wa ntata ngwana ya lehlaswa wa ho tshwarela mora wa hae ha a mo sitetswe ka ho phela ka bootswa, ka leruo leo a neng a mo file lona lefatsheng la boditjhaba. Jwale botle bona ba senngwa ke mora wa hae e moholo, moholwane wa ngwana ya lehlaswa ka mantse ana: ”Empa enwa mora wa hao ya jeleng letlotlo la hao kaofela le dinyatsi, ere a sa fihla, o mo hlabetse namane e nontshitsweng”

Re tla kena jwale karolong ya bobedi ho bona:

KGALEFO YA MOHOLWANE WA NGWANA YA LEHLASWA.

O bua le ntata`e a halefile haholo. Empa ntata`e a mo hlalose tsa hae, haele ngwanabo o ne a shwele, mme o pholohile, o ne a lahlehile, mme jwale o boetse o fumanwe. Phutheho ya Modimo, Modimo o re hlokometse maphelong a rona hore ha motho a etsa thato ya hae ho ya ka lentswe la wona, diabolosi o kenya pelaelo, moya o mobe o ditshila ho motho, hore a tle a se ke a tsamaya tseleng e ntle ya Modimo. Ngwana ya lehlaswa o entse ntho e ntle, a ipolela dibe tsa hae ho Ntata`e a inyatsetsa tsona. Ntata`e a mo tshwarela tsona ho ya ka lentswe la Modimo le laelang batho ho tshwarelana melato.

Moholwane wa ngwana ya lehlaswa le hoja a ile a bua le ntata`e ka kgalefo, empa o ile a kgotsofatswa ke tlhalosetso ya ntata`e, hore ngwanabo o ne a shwele, mme jwale o pholohile, o ne a lahlehile mme jwale o boetse o fumanwe. Bohle ba ile ba tshwarelana, ka diketso tse mpe tse etsahetseng, kapa bobbe bo etsahetseng, mohlomong e mong a foseditse e mong, kapa ba bang. Ke ntho e ntle ho tshwarelana. Empa ho hloyana kapa ho bolayana, ke ntho e mpe e sa lokang. Bible e re ruta ke hona mokgwa o motle wa se-Kreste wa ho tshwarelana ditshito ho (Mattheu 18:15). Lentswe la Modimo le re ruta diketso tse ntle, e le hore e tle e be mohlala o motle ho rona wa ho ratana, jwaleka ha Morena Jesu a re ratile. Baratuwa ba Morena, ha re kgalemelaneng dinthong tse mpe tse sa lokang, empa le teng re hlokomele ho itshetleha dinthong tsohle ka lentswe la Modimo. Ha re hopoleng ka mehla thapelo yeo Morena Jesu Kreste a re sietseng yona ya: "*O RE TSWHARELE MELATO YA RONA, JWALEKA HA RE TSWHARELA BA NANG LE MELATO HO RONA*".

Morena a ke a re thuse ho etsa jwalo.

Amen.

BALA: JOHANNE 17:11–26
TEMANA: 22–24

SONTAHA SA 18

POTSO 49: NA NYOLOHELO YA KRESTE LEHODIMONG E NA LE MOLEMO O FE HO RONA ?

KARABO:

- (a) Taba ya pele, ke hore ke yena: MMUELLI wa rona lehodimong pela sefahleho sa Ntata`e.
- (b) Taba ya bobedi, ke hore: Re na le nama ya rona lehodimong e le tebeletso e tiileng ya hore yena, e le Hlooho, rona re le ditho tsa hae, o tla re nkela ho yena.
- (c) Taba ya boraro, ke hore o re romela Moya wa hae e le tebeletso e re sallang.
- (d) Woo ka matla a wona re batlang, e seng tse lefatsheng, empa tse hodimo moo Kreste a leng teng letsohong le letona la Modimo.

Ho ya kamoo re hlokomelang le ho utlwisisa kateng katekisma ha e botse hore na “ Nyolohelo ya Kreste lehodimong e na le molemo ofe ho motho?” Empa potso e re: “KE MOLEMO OFE WOO E BILENG LE WONA HO MODUMEDI? Ka mokgwa o jwalo katekisma e fapana le batho ba reng: JWALE JESU O TLOHILE LEFATSHENG MOO A KA BENG A ILE A SEBETSA HAHOLO LE HO RE ETSETSA MELEMO YA BOHLOKWA. Taba ya rona ya sehlooho re e fumana e le: “MOLEMO WA NYOLOHELO LEHODIMONG KE OFE?” Dintlha tsa bohlokwa sehloohong sena ke:

- (a) *KE “MMUELLI WA RONA LEHODIMONG”*
- (b) *“NAMA YA RONA E TLA YA LEHODIMONG”*
- (c) *“O ROMETSE MOYA WA HAE O HALALELANG”*

(a) *KE MMUELLI WA RONA LEHODIMONG*

Ha re bala temana ya rona ya sehlooho ka thapelo ya Jesu. E bitswa thapelo ya Boprasta. Lehoja a ne a sa ntse a le lefatsheng, Jesu o rapela jwaleka hoja a se a le lehodimong. Ketso ena ya hae e re ruta dintho tse ngata. Tabeng ya pele re se re qala jwale ho ithuta ka mosebetsi wa hae ha a se a le lehodimong. Wa re rapella ka thapelo ya hae. Lehodimong o re rapella jwaleka ha a ne a re rapella mona lefatsheng. O na le tokelo e jwalo, ka lebaka la hoba o re shwetse dibe sefapanong Golgotha, mme ka mokgwa o jwalo o re rekile ka madi a hae a tsholohileng sefapanong. Jwale a ka nna a ya ho Ntate lehodimong a re: “*KE BA REKILE KA MADI A KA A TSHOLOHILENG. BA HLATSWITSWE MADING A KA, BA HLWEKILE*”

Ke ba rapella hore o ba nke jwaleka bana ba hao, hore ba tle ba se ke ba iswa tahlehong e sa feleng. Haesale Jesu a nkelwa lehodimong, re na le mmuelli lehodimong. Phutheho ya Modimo ha re thabeng le ho tshediseha ka hoba teng ha Jesu Kreste lehodimong. O dutse letsohong le letona la Modimo Ntate, ke mmuelli wa rona, hape ke Morapelli wa rona. Ke yena ya reng: “*TSHOLE TSEO RE KA DI QELANG HO MODIMO NTATE KA LEBITSO LA HAE, RE DI ETSETSWE*”.

(b) Jesu o tlile lefatsheng. A nka botho ba rona ba nama le madi. Ka ona mmele oo wa rona wa botho, o nyolohetse lehodimong ka mokgwa o jwalo, hoo ke pontsho ya hore motho ka nama a ka ya lehodimong. Haholo re bolela motho wa modumedi, ka lebaka la hoba Jesu Krete a se a re buletse mohlala wa ho etsa jwalo. Ha re bala ho (Johanne 17:24) re fumana mantswa a reng: *“NTATE, BAO O NNEILENG BONA, KE RATA HORE MOO KE LENG TENG, LE BONA BA BE TENG LE NNA, BA TLE BA TADIME KGANYA YA KA, YEO O NNEILENG YONA LEFATSHE LE ESO THEWE.”*

Morena Jesu Krete o kene lehodimong, mme o tla re nka ho kena le yena. Temana ya rona ho (Johannae 17:24) e tshehetsa taba ya hore ba dumetseng ho Jesu Krete le bona ba tla nkelwa lehodimong ka nama. Morena Jesu Krete o batla hore ba dumetseng ho yena le bona ba fumane kganya ya lehodimo, ka ho nkelwa lehodimong. Yena jwaleka hlooho o se a le lehodimong, rona jwaleka ditho tsa mmela, le rona re tla nkelwa ka mmele o tletseng moo. Re tla kena jwale ntlheng ya boraro e reng:

(c) *“O ROMETSE MOYA WA HAE”*

Morena Jesu Krete, ha a se a le lehodimong ha a ka a tlohella ba dumetseng ho Yena matleng a Satane. O rapetse Ntata`e hore a se ke a ba tlosa lefatsheng, empa a ba sireletsa matleng a Satane a ba boloke BOBENG.

Re fumane hore Morena Jesu o ne a sa rapelle badumedi feela hore ba sireletse matleng a Satane le ho ba boloka bobeng, empa o ile a romela le wona MOYA WA HAE O HALALELANG ho re etella-pele le ho re boloka lefatsheng tseleng ena e isang badumedi lehodimong. Moya o halalelang o re ruta hore re phahamise mahlo a rona, re batle tsa lehodimo re sa ntse re le mona lefatsheng.

Moya o Halalelang o re lokisetse lehodimo, re tle re le tshwanele ka ho sokoloha dibeng tsa rona. O re ruta seo kgalalelo e leng sona. Baratuwa Moreneng. Ha re hopoleng hore le hoja Jesu Krete a le lehodimong, ho tshwana leha a ntse a le teng lefatsheng. O ntse a re rapella. Ha a re tlohele feela lefatsheng. Ke yona ntho e re nehang matshediso, le matla. Batho ba bangata ba nahana hore hoja Jesu o teng lefatsheng, o ne a tla thusa batho ka ho ba etsetsa melemo e mengata, ho feta ha a le lehodimong. Lentswe la Modimo le re ntho e nngwe le e nngwe yeo re e kopang ka thapelo, o tla re etsetsa yona leha e ke ke ya e-ba ka yona nako yeo re kopang ka yona. Re tshwanetse ho tshepa le ho dumela hore Modimo o tla arabela thapelo ya rona. Re rapela ka boikokobetso.

Hape ha re rapela Modimo, re tshwanetse ho tseba hore ha re laele Modimo ho etsa seo re se ratang kapa seo re se batlang. Le hoja Lentswe la Modimo le re rutila hore: *“KOPANG, LE TLA FUWA, BATLANG LE TLA FUMANA, KOKOTANG LE TLA BULELWA.”* Re tshwanetse hore re ipotse hore na ha ngwana wa Modimo a kopa sebe, hape a se na hlomphe ha a buisana le Modimo, thapelo e jwalo re lebeletse hore Modimo o e arabele jwang? Morena a ke a re thuse ho hopola hore Jesu Krete ke mmuelli wa rona lehodimong. O re tshepisa ho re nkela ka nama lehodimong o re: *“NTATE BAO O NNEILENG BONA, KE RATA HORE MOO KE LENG TENG, LE BONA BA BE TENG LENNA.”* Hape, Morena Jesu o re sietse MOYA wa hae o HALALELANG, MOYA WA MATSHEDISO.

Morena a re thuse ho hopola kamehla.

Amen.

BALA: JOHANNE 13:1–17

TEMANA: 3,14

- (3) Morena Jesu o tswa ho Modimo, mme o ya ho Modimo.
(14) Mme jwale ekare ha nna, ke leng MORENA le MORUTI ke hlatswitse maoto a lona, le lona le tshwanetse ho hlatswana maoto.

Seo e leng hlooho ya ditaba ditemaneng tseo re di badileng ke hore: “MORENA JESU O HLATSWA MAOTO A BARUTUWA BA HAE PELE HO PASEKA”.

(l) Tabeng ya pele, lebaka ke hobane o tswa ho Modimo, mme jwale o boela ho Modimo. Ha ho ntho e ka arohanyang ba dumelang ho Morena Jesu le lerato la Krete. Ke ka lebaka leo a ileng a bontsha lerato la hae ho bona ka ho ba hlatswa maoto. Morena Jesu o hlatswa barutuwa ba hae maoto, kahobane wa tseba hore nako ya hae e fihlile ya ho tloha lefatsheng ho ya ho Ntatae lehodimong, jwaleka ha temana ya rona e bolela, ya boraro.

Ha re tadimisisa bophelo ba badumedi lefatsheng, re hlokomela hore ha ba e-shwa, ba hlokahala, ba tloha lefatsheng lena ba ya ho Ntate ya mahodimong. Evangeding ho ya ka (Johanne 14:3) e tiisa taba ena ha e baleha tjena: “*Mme etlare ha ke se ke ile, ke le lokiseditse bodulo, ke tla boela ke boye, ke le nkele ho nna hore moo nna ke leng teng, le lona le be teng*”. Hlatsuo ena ya maoto e bontsha hlatsuo ya meya e silafaditsweng ke sebe. Petrose le hoja a kile a hana ho hlatsuwa ke Morena Jesu pele, empa kamorao o ile a dumela ho hlatsuwa ke Morena Jesu. Kamorao hore Morena Jesu a mo kgalemele hore a ikokobetse, le hore a bolellwe hore bohle ba hanang ho hlatsuwa ke Morena Jesu ha ba na karolo ho yena.

Pontsho ya hore Petrose o dumetse ho hlatsuwa o itse: “Morena, a e sebe maoto a ka feela, e be le wona matsoho le hlooho” (Johanne 13:9). Bohle barutuwa ba leshome le motso o mong ba ile ba hlatswa ke Morena Jesu kantle ho Judase Iskariota ya ileng a hana ho hlatsuwa. Ke ka lebaka leo Morena Jesu ditemaneng tsa 10 le 11 a reng: Lehlwekile empa e seng bohle. Madi a Morena Jesu a hlatswa baetsadibe bohle. O hlatswitse barutuwa ba hae jwaleka mong a mosebetsi ya lefang basebesti ba hae moputso pele ba qala mosebetsi.

Morena Jesu o re ho barutuwa ba hae “*Le hlwekile, hobane le hlatswitswe, le kolobeditswe ka lebitso la ka*”. Phutheho ya Modimo a re hopoleng hore le ha re le ba-Kreste ba kolobeditsweng, hwa hlokahala hore re hlwekiswe ka Lentswe la Modimo kamehla. Ke ka lebaka leo Morena Jesu a ekeleditseng kolobetso e Halalelang, ka sakramente ya selallo se Halalelang. Hape-hape re ntse re hopotswa ka hlwekiso e entsweng ke Morena Jesu sefapanong.

(14) Mme jwale ekare ha nna ke leng Morena le Moruti ke hlatswitse maoto a lona, le lona le tshwanetse ho hlatswana maoto. Mona, Morena Jesu o ruta barutuwa ba hae ka ketso yeo ya ho ba hlatswa maoto hore ke mohlala o motle woo ba tshwanetseng ho o latela le bona ba hlatswane maoto. Ketso ya ho hlatswana maoto ke pontsho ya ho tiisa tsa ho hlweka ha rona kamehla jwaleka ba-Kreste, mme mosebetsi ona o phethwa hantle ka Selallo se Halalelang. Hape re tshwanetse ho utlwisisa hore ha re tisa tafoleng ya Morena, dibe tseo re di entseng re

tlile ho di kopela tshwarelo, hore a tle a re hlatswe maoto, jwaleka ha a entse ho barutuwa ba hae.

Ka mokgwa o jwalo feela, ha re fana ka Selallo se Halalelang ho e mong le e mong wa rona re etsa hantle kamoo Krete a re laetseng. Krete o re: *“Ke le file mohlala wa hore le etse jwaleka ha ke entse ho lona”*. Phutheho ya Modimo a re atameleng Modimo ka dithapelo, re mo kope hore hlatswa e seng feela maoto a rona, esita le wona matsoho le hlooho, le ditshila tse ding tseo re sa di hlokomeleng mmeleng ya rona yohle. Thuto ya Morena Jesu ho barutuwa ba hae esita le ho rona badumetseng ho yena kajeno ke: Boikokobetso le ho ikukela fatshe, ke yena ya tla re phahamisa.

Barutuwa ba hae ba ne ba atisa ho lebala thuto ena. Ba ne ba iphahamisa, ba ikukela hodimo, ba ikgohomosa ba ikgantsha. Empa kajeno re bona ha Jesu Krete a ba ruta ka tsela yeo ho seng bonolo hore ba ka e lebala. Morena Jesu o kga metsi, o itlama ka thaole thekeng, wa ba bitsa o ba hlatswa maoto. O re ho bona: *“Kea tsamaya ke ya ho Ntate lehodimong hona moo ke tswa teng”*.

Nako ya ka ya ho tloha lefatsheng lena e se e fihlile. Ke le siela molao o motjha ke re: *“Ratanang, jwaleka ha ke le ratile”*. Hlatswang maoto, jwaleka ha ke le hlatswitse, ka ba ka le hlakola metsi ka thaole. E se eka Morena a ka re thusa ho hopola ditaba tsena tsa bohlokwa tsa ha Morena Jesu ha a hlatswa maoto a barutuwa ba hae pele ho Paseka, ha a e-ya ho Modimo Ntata’e, moo a tswang teng.

Amen.

BALA: 1 BAKORINTHE 15:24–26
TEMANA: 25,26

HOBANE E KA KGONA A BUSE, A TLE A BE A BEE DIRA TSOHLE KA TLASA MAOTO A HAE, SERA SE TLANG HO FEDISWA MORAORAO KE LEFU.

Lefu ke ntho yeo rona batho re e tshabang haholo, hobane le tla ho rona batho re sa lebella. Le tla ho rona jwaleka leshodu la bosiu le tlang ho se motho ya le lebeletseng. Le tshwana le modisa wa dinku. Ha bosiu bo atametse e se e le mantsiboya o kgannela dinku ka potlako ho ya ka lesakeng. Lefu le lona le jwalo. Nako yeo Modimo o re fileng yona ya ho phela lefatsheng ha e-se e fihlile, lefu le re bokeletsa ka potlako ho re kgannela ka lesakeng. Batho ba bang ba phela lefatsheng feela, ebe ba ya falla, ba ya hae Moreneng mmusong wa Modimo, ba tlaha ka lefu. Ba bang ba phela dibeke kapa dikgwedi feela. Athe ba bang ba phela dilemo tse kgutshwanyane ba bang tse telele.

(I) Ho na le batho ba bitsang lefu motswalle wa bona. Ba bang ba teng hape ba le bitsang:
(ii) sera sa bona. Re tla tadima mabaka ao a bona hore:

(a) LEFU HA E LE MOTSWALLE ke ha ho le jwang? Hape-hape
(b) LEFU HA E LE SERA teng ke ha ho le jwang?

(a) LEFU HA E LE MOTSWALLE: Batho ba sehlopa sena ba re: thuso e kgolo yeo ba e bonang ke ha motho o kula haholo, o robotse diphateng tse tjhesang. Motho ke ha a hlokiswa boroko bo monate, a babelwa ke bohloko bo mo tshwereng, bo mo hlokisa kgotso. A lliswa ke bohloko bona bosiu le motshehare. Mohlomong, bohloko bo tshwereng motho enwa, ha se bo phekohang, bo hlotse meriana e mengata ya dingaka tse ngata. Moya wa motho e se ebile eka o tla tswa nameng. Ha lefu le fihla ho motho ya boemong bo tjena, le mo fetohela motswalle. Mme ke lona lebaka le leholo leo a bitsang lefu motswalle. O lakatsa lefu ka baka la bohloko boo a a bo utlwang, empa lefu le a mo balehela.

Hape ho kula ho tshwanang le hwa Jobo. A ikgwabitle ka lengeta bosiu le motsheare. A dula thotobolong, empa bohloko bo ne bo sa kokobebe mmeleng wa hae. Ke o mong mohlala woo lefu ha le fihla, motho a kale bitsang motswalle, kahobane lefu le mo phomotsa bohlokong boo a bo jereng. Re tla tadima:

(b) LEFU HA E LE SERA: Batho bitsang lefu sera, ke hobane lefu ha le rerise motho e moholo kapa e monyenyane ha le tla ho yena. Le sehloho jwaleka ha lengolo le Halalelang ha le bolela. Ke tla qolla taba e le nngwe e tshehetsang taba ena. Ha re bala mantswe a reng: *“MORA MOTHO, BONA KA LEFU LE SEHLOHO KE TLA O AMOHA SE RATWANG KE MAHLO A HAO. O SE KE WA LLA, LEHA E LE HO BOKOLLA MEOKGO YA HAO E SE KE YA KELEKETLA. O FEHELWE O NTSE O KGUTSITSE”*

Ke amang a mabaka a e-tsang hore re hlokomele, hore lefu ke sera. Ha motho a felehetsa mofu e mong, ho ya mo pata mabatleng. Lefu le o hopotsa hore le wena o itokise, kamoso le wena e

tla be e le wena, ya tla felehetswa ho ya mabitleng. Lefu jwaleka sera ha motho a qala a kula ditho tse ding tsa mmele wa hae di le bohloko, le se le ntse le hopotsa motho hore le atametse, neng kapa neng le ka nna la tla mo kuka.

Ho na le batho ba bang, bao lefu jwaleka sera le ba nkang. Motho a shwe le ho kula a sa ka a kula. Ba bang ba bolawe ke dikebekwa, ba bang dikotsi tsa makoloi, ba bang ba wele matamong kapa dinokeng. Moo lefu le leng sehloho ka ho fetisisa, ke hobane motho a ke ke a tseba selemo seo a tla shwa ka sona, leha e le lona lefu leo a tla shwa ka lona, kapa kgwedi, le ha e le letsatsi. Phutheho ya Modimo a re tsebeng hore Jesu Mora Modimo o lehlakoreng la rona, ntweng yeo re e lwanang le lefu. Le ho yena lefu ke sera. O batla hore re rue bophelo bo sa feleng, e seng lefu le sa feleng. Ha a ne a le lefatsheng, o ile a lwantsha lefu, ka ho tsosa bafu mabitleng. Re ka qolla Lazaro kgaitsemi ya Maretha le Maria. Morena Jesu a re: *“Lazaro tswa moo”* (Johanne 11:43). Hape moradi wa Jairuse. Morena Jesu a re: *“Ngwanana, ke re ho wena TSOHA”* (Mareka 5:41).

Ba neng ba kula, Morena Jesu o ne a ba fodisa. Ba lapileng a ba fa dijo, e le hore tlala e se ba bolaye. Yena Morena ka sebele sa hae o ile a kena lefung. A lwantsha lefu ka hara lebitla, a utlwiswa bohloko boo ekang ba dihele. A hlola lefu, a tswa lebitleng ka letsatsi la boraro. Ke ka lebaka lena moapostole Pauluse a reng: **“LEFU TSENENE YA HAO E KAE NA? WENA LEBITLA HO HLOLA HA HAO HO KAE NA?”**

Phutheho ya Modimo a re hopoleng hore ka ho tsoha ha Morena Jesu bafung, lefu le ile la bolawa ho hang. Jwaleka temana ya rona e bolela hore lefu ke sera se tlang ho fediswa moraorao. Morena Jesu o ile a fedisa le tsona dibe, hobane lefu le bakilwe ke dibe. Hape a re hopoleng , hore lefu ke tsela, kapa monyako oo bohle ba dumelang ho Jesu ba kenang ka wona, hoya mmusong wa Modimo. Moo Morena Jesu a leng hona teng. A re ineheleng ho Jesu Krete. O hlotse Satane, lefu le lebitla. Ha ho ya ka kenang mmusong, haese ka yena.

Amen.

BALA: JOHANNE 11:11–25
TEMANA: 11,25

(11) LASARO, MOTSWALLE WA RONA O ROBOTSE EMPA KE YA MOTSOSA BOROKONG.

(25) JESU A RE HO YENA KE NNA TSOHO LE BOPHELO, YA DUMELANG HO NNA LEHA A SHWELE O TLA PHELA.

Nakong yeo batho ba kopaneng ka lebaka la lefu, ba swabile haholo, ba ferekane mehopolo, ba bang ba lla. Motsotsong ona woo batho ba tshedisana ka mekgwa e mengata e sa tshwaneng. Matshediso a tlisa tshepo e ntjha, ho bao ba hlabilweng, bao mofu a ba siileng, hape matshediso a fa motho matla. Morena Jesu Kreste mora Modimo nakong yeo a ntseng a phela lefatsheng, o ile a tlisa matshediso le lapeng labo Maretha le Maria, dikgaitsemi tsa LAZARO mane BETHANIA ka lefu la Lazaro. O re Morena Jesu:

(ii) LAZARO motswalle wa rona o robotse, empa ke ya mo tsosa borokong. Ha a lemoha Morena Jesu hore batho ha ba utlwisise puo ena ya hae ya ho bitsa lefu boroko yaba o ba bolella phatlalatsa a re: *“LAZARO O SHWELE”* (Johanne 11:14).

Ka tlung habo Maretha le Maria moo ho neng ho rena kgotso, le lerato le bonahala, jwale lefu le hlahile le sentse ho utlwahala dillo, ho bonahala le ona mahlomola. Se batlehang jwale ke matshediso. Lengolo le Halalelang la Modimo le hlalosa lefu ha e le ntho e sehloho. Ha le e-tla ho motho ha le mo rerise, le tla jwaleka leshodu la bosiu, le tlang mong a ntlo a sa lebella, le ho notlela lemati la ntlo a sa notlela. Lefu le nka ba lokileng, ba sebeletsang Modimo, ba baholo le ba banyenyane. Empa le bona ba bae, ba kgopo, ba hanang ho sokoloha, ba hanang ho dumela ho Jesu Kreste, ka lebaka la menate ya dibe lea ba kuka. Ba falla lefatsheng ho ya lehodimong.

Lentswe la Modimo le toboketsang ka bobbe, le sehloho sa lefu re le bala ho (Ezekiele 24:16,17) le re: *“Mora motho, bona, ka lefu le sehloho ke tla o amoha se ratwang ke mahlo a hao. O se ke wa lla, leha e le ho bokolla. Meokgo ya hao e se ke ya keketla. O fehelwe o ntse o kgutsitse”* Maretha le Maria ba ile ba hlahelwa ke lefu lena le sehloho, la nka Lazaro kgaitsemi ya bona. Ha Morena Jesu a fihla, Lazaro o ne a le letsatsi la bone a le lebitleng. Maretha a re ho Morena Jesu: *“Morena, hojane wa ba teng, kgaitsemi yaka a ka be a sa ka a shwa”*. Morena Jesu a mo araba ka ho re: *“Kgaitsemi wa hao o tla tsoha”*.

Phutheho ya Modimo, seo re se hlokomelang polelong ena ke hore tsoho ya bafu mabatleng e bolelwa ke Morena Jesu. Taba ena e re lebisa ntlheng ya rona ya bobedi.

(25) JESU A RE HO YENA: *“KE NNA TSOHO LE BOPHELO, YA DUMELANG HO NNA, LEHA A SHWELE, O TLA PHELA”* (JOHANNE 11:25). Mantswe ana ke: Ho paka hore Morena Jesu ke Mora Modimo, le hore o neilwe matla ohle lehodimong le lefatsheng, o ile a ya lebitleng a re: *“Lazaro tswa moo”* (Johanne 11:43). Yaba o re ho bona: *“Mo lokolleng le mo lesele a itsamaele”* (Johanne 11:44).

Phutheho ya Modimo, le mehleng ena ya rona kajeno, Morena Jesu Kreste o tshepisa bohle ba dumetseng ho yena hore o tla ba tsosetsa bophelo bo sa feleng. O tla ba tshwarela dibe tsa bona, ka mohau wa hae o moholo, mme a ba kentsheng mmusong wa Modimo o sa feleng. Morena Jesu Kreste o ile a hlola Satane ka meleko yeo diabolose a neng a mo leka ka yona. Ha a se a kene lebitleng ka letsatsi la boraro, e le ha a hlotse Satane.

Ke ka lebaka leo banna ba kang bo-Pauluse ba itseng: *“LEFU TSENENE YA HAO E KAE? WENA LEBITLA, HO HLOLA HA HAO HOKAE NA?* Pauluse a qetela ka hore: *“A re leboheng Modimo ka lebaka la Jesu Kreste Morena wa rona”* – AMEN Morena Jesu ha a se a hlotse Satane, lefu le lebitla O ile a dula lefatsheng matsatsi a mashome a mane, le masiu a mashome a mane, e le hore le bona ba belaelang jwaleka bo-Thomase, e tle e re ha ba bona maqeba mmeleng wa hae, ba tle ba kgolwe, ba dumele, hore kannete ofela a tsohile lebitleng.

Moapostole Pauluse ha a tiisa ho paka hore Morena Jesu o tsohile lebitleng o re: *“Banabeso, ha ke rate hore le ka hloka tsebo tabeng ya ba ithobaletseng, le tle le se ke la hlomoha jwaleka babang ba se nang tshepo. Ha re dumetse hoba Jesu o kile a shwa, a ba a tsoha le hona re tshwanetse ho dumela, hoba ba ithobaletseng, Modimo o tla ba tsosa ka Jesu.”* (Bathessalonika 4:13-14).

Baratuwa Moreneng a re tshedisaneng ka mantswa a tshwanang le ana ha re hlahetswe ke mafu, le ke ditsietsi tsa bophelo. Jesu Kreste ke tsela, le nnete le bophelo, ha ho motho ya ka tlang ho NTATE MODIMO haese ka yena (Johanne 4:11-12). Ke wa hae, ke yena ya ipehileng kathoko ho mmuso wa Modimo. Haele Morena Jesu Kreste yena o re bitsa bohle o re: *“TLONG HO NNA LONA BOHLE BA KGATHETSENG BA IMELWANG KE TLA LE IMOLLA”* (MATTHEU 11:28).

Baratuwa ba Morena ha re dumeleng ka nnete hore ya tsositseng Morena Jesu Kreste lebitleng o tla re tsosa le rona (2 Bakorinthe 4:14). Morena a ke a re thuse ho dumela hore tsoho ya bafu ke ntho e leng teng hobane e bolelwa ke Lentswe la Modimo.

Amen.

BALA: 2 MARENA 5:8–15
TEMANA: 8,14–15

ELISHA MOHLANKA WA MODIMO A RE: *“A KE A TLE HO NNA, O TLA TSEBA HOBANE MOPOROFETA O TENG ISERAELENG”*

Ditemana tseo re di badileng tsa 14 ho isa ho 15, di bua ka pholoso ya monna ya bitswang Naamane. Ha a se a fodisitswe Naamane, o ile a leboha pholoso yeo. Re tla tadima dintlha tse pedi feela e leng

(I) SE BOLELWANG KE PHOLOSO YEO LE
(II) TEBOHO KA PHOLOSO YEO.

(I) SE BOLELWANG KE PHOLOSO YEO

Monna enwa Naamane e ne e le monna wa bohlokwa setjhabeng sa habo. E ne e le moeta-pele, ebile e le molaodi wa mabotho a ntwana a setjhaba sa habo. Le hoja e ne e le moeta-pele e moholo hakaalo setjhabeng, empa e ne e le mokudi wa lefu le lebe la lepera. Motho wa lefu le jwalo o ne a sa dumellwe ho phela le ho dula le batho ba bang, ka hobane lefu leo e le le tshwaetsanang, a ka tshwaetsa batho ba bang ha bonolo. Ka mokgwa o jwalo, motho ya jwalo, o ne a bewa ka thoko ho motse ho fihlela a eshwa, mehleng yeo. Ho thwe Naamane o ne a se a utlwetse ka moporofeta wa Modimo ya phelang setjhabeng sa Iseraele ya fodisang. Moporofeta enwa o ne a etsa dimakatso, ka mohau wa Modimo.

Yaba Naamane o fumantshwa lengolo ke morena wa hae ho ya ho setjhaba sa Iseraele ho ya batla moporofeta Elisha. Elisha ha a ka a tswa ka hara ntlo ya hae ho thusa monna enwa Naamane. O ile a romela lenqosa la hae hore le bolelle Naamane a ye nokeng ya Jordane a itlhatswe teng ha supa mme nama ya hae e tla boela ho yena e ntjhafetse. O tla hlweka. Empa Naamane o ile a halefa haholo a rata le ho kgutlela hae. O na a nahanne hore moporofeta o tla tswela ho yena, a bitse lebitso la Jehova Modimo ho leng bohloko teng, a mo fodisa lepera.

Empa bahlanka ba hae ba ile ba mo kgothatsa hore a etse kamoo moporofeta a mo laelang kateng. O ile a amohela keletso ya bahlanka ba hae. A itebisa nokeng Jordane ha supa ka polelo ya monna wa Modimo. Nama ya hae ya e-ba jwaleka nama ya ngwana e monyenyanane. A hla a hlweka monna enwa ya neng a hana dikeletso tsa Modimo. Ka mohau wa Modimo a fodiswa, o fahliswa bohlokong ba hae. Ke mokgwa o jwalo a pholoswa, lefung lena le lebe la lepera.

TEBOHO: Naamane ha a etswa metsing hara noka ya Jordane a iphumana a fodile. A bona hore monna wa Modimo o nea bua nnete mme o mo thusitse. O ile a leboha Modimo ka pholoso eo. A kgutlela le ho ena Elisha ho isa teboho ya hae le ho mo fa mpho ya teboho. A re ho Elisha ke a tseba ha ho Modimo lefatsheng lohle haese Iseraeleng. Phutheho ya Modimo, kahobane Jesu Krete a tile lefatsheng e le ngaka e kgolo e fetang dingaka tsohle, Naamane o ile a pholoswa feela ka metsi a noka ya Jordane. Jwaleka Elisha ha a ne a fodisa ka metsi a

noka ya Jordane Modimo o fodisa jwalo batho ba baetsadibe dibeng tsa bona, ka madi a Jesu Kreste, a tsholohileng sefapanong.

Naamane a ipolela tumelo ya hae, mme o leboha Modimo le moprofeta ka pholoso, bohlokong ba hae bo bobo ba lefu la lepera. Phutheho ya Modimo le rona re pholositswe dibeng tsa rona ka madi a Jesu Kreste. Ha re ne re sa pholoswa, re ne re tla iswa timelong, moo ho seng tshwarelo ya dibe teng. A re leboheng Modimo ka pholoso ena ya ho hlatswa dibe ka madi a Jesu Kreste a tsholohileng. Dibe tsa rona ha di hlatsuwe feela ka mesti a noka ya Jordane jwaleka tsa monna ya bitswang Naamane. Empa rona re hlatsua ka madi a Jesu Kreste. Ke ka lebaka leo re tshwanetseng ho leboha haholo-holo ho fetisa Naamane, yena o ile a pholoswa feela bohlokong ba mmele.

Phutheho ya Modimo ha re hopoleng hore rona re fodisitswe ka madi a Jesu Kreste ho dibe tse neng di ka re tlisetsa lefu le sa feleng le hlokang tshwarelo ya dibe.

MOTHO A KA BOTSA HORE NA TEBOHO YA RONA HO MODIMO RE KA E BONTSHA KA MOKGWA O JWANG?

Tsela e bonolo yeo re ka e hlalosing ka hore e lokile ebile e sasametse ke ya ho mamela Lentswe la Modimo e be re furalla tsela ya sebe, re amohela LENTSWE. Ha se ntho e ka re thusang hore e be re pholoswa dibeng tsa rona, empa jwale ho bontshahale hore re boetse re kgutletse ho tsona, re phela ho tsona. Tjhee banabeso ha re baleheleng dibe tsa rona re etsiseng Naamane ka ho leboha Modimo le ho ipolela dibe tsa rona. Modimo o tla re hauhela, a re leballe melato ya rona.

Mpho yeo re ka lebohang Modimo ka yona ke ho mo rapela le ho mo sebeletsa kamehla. Modimo o ke o re thuse, re tlise diteboho tsa rona ho wona, ka dithapelo le ditshebeletso ka dinako tsohle. Modimo ha wa re pholosa feela malwetseng a rona a mefuta-futa, empa le dikotsing le ditsietsing ebile mothusi wa rona. Morena a re thuse ho mo rapela kamehla ka lerato le ka mafolo-folo ohle.

Amen.

BALA: TSHENOLO 3:14–22
TEMANA: 15–18

HA O BATE HA O TJHESE, MME JWALE EREKAHA O LE FOFO O SA BATE O SA TJHESE KE TLA O HLATSA MOLOMONG WA KA. ERE KA HA O RE: KE MORUI, KE MONONI, MME HA KE HLOKE LETHO, ATHE HA O TSEBE HOBANE O SOTO, MADIMABE, O MUFUTSANA O SEFOFU, O FEELA. FEELA KE A O ELETSA HORE O ITHEKELE HO NNA KGauta E HLWEKISITSWENG MOLLONG. O TLE O RUE LE DIAPARO TSE TSHWEU O TLE O APARE DIHLONG TSA BOFEELA BA HAO DI TLE DI SE KE TSA BONAHALA, ITHEKELE LE SETLOLO SA MAHLO, HO O TLOTSA KA SONA, O TLE O BONE.

Mantswe ana a ngotswe ke Morena Jesu Krete a sebedisa mohlanka wa hae Johanne mora Sebedia ha a le sehleke-hlekeng sa Patmose. O ile a ngolla diphutheho tse fapa-fapaneng, ho di kgalemela esita le hona ho di eletsa. Hape-hape le ho di matlafatsa tumelong. Taba ya sehlooho ke hore:

PHUTHEHO YA LAODISEA E NTSHTWA BOFOFONG.

Tabeng ya pele re tla tadima (a) Boemo ba phutheho moo e hlomilweng
Tabeng ya bobedi re tadime (b) Mokgwa woo e tsositweng ka teng, ka Lentswe la Jesu.

(a) BOEMO BA PHUTHEHO

Phutheho ena ya Laodisea ke e nngwe ya diphutheho tsa kgale tsa se-Kreste Asia. Badumedi ba phutheho ena ba ne ba inahana le ho ikuka e le batho ba bohlokwa, le yona phutheho ya bona ba ne ba e nka e le e nang le mohlala o motle ho diphutheho tse ding, mabapi le tumelo ho Modimo le ho Jesu Krete. Motse woo phutheho e neng e hlomilwe ho wona wa Laodisea e ne e le teropo e kgolo e tswetseng-pele. Ho ne ho e-na le di-hospitala, le di-kliniki, di-faboriki tsa kgwebo le di-Indaseteri moo batho ba neng ba sebeta teng hore ba tle ba fumane tjhelete ya ho iphedisa.

Dikolo tse tlase le tse phahameng le ho ya ka mafapha a tsona, moo bana ba rutwang le ho ithuta le tsona di ne di le teng. Dikereke le diphutheho moo tshebeletso ya Modimo e etswang, le tsona di ne di le teng. Badumedi ba phutheho ena ya Laodesia, e neng e le ya kgale ya se-Kreste, ba ne ba nahana hore ba lokile ho feta badumedi ba bang ba dikereke tse ding. E ne e le batho bao re ka ba tshwantshang le Bafarisi ka boiphahamiso le boikgantso ba bona. Ba ne ba se ba sa batle dikeletso tsa bohlokwa ka ditaba tsa Modimo, kahobane ba ne ba ithorisa ka hore ke ba-Kreste ba kgale, hape ba phethahetse tumelong.

Ba ne ba re:

“RE TSWALLWA TUMELONG. RE TSEBA THAPELO, RE TSEBA DITHERO, RE KOLOBEDITSWE. RE HLOMAMISITSWE, RE JA SELALLO SE HALALELANG BODUMEDING RE PHETHAHETSE, RE MAPHOLOSWA A NNETE.”

(b) Re tla bona jwale, mokgwa woo phutheho e tsositsweng ka Lentswe. Lentswe la Morena Jesu le ile la tlela phutheho ena ya Laodisia ka Johanne mora Sebedia ho e tsosa bofofong boo e neng e le ho bona.

Lentswe le re: *“KE TSEBA MESEBETSI YA HAO, HA O BATE HA O TJHESE, MME JWALE EREKAHA O LE FOFO, O SA BATE O SA TJHESE, KE TLA O HLATSA MOLOMONG WA KA”*.

Phutheho ya Modimo rea tseba hore motho ha a nyorilwe o batla metsi a batang, hore a tle a kgodise lenyora la hae. Ha a fumana metsi a sa bate, a le mahareng a ho bata le ho tjhesa, o tshwela metsi ao, kahobane a hloka sebopeho, a sa bate empa le teng a sa tjhesa. Ntho e fofo ke ntho e mahareng a ho bata le ho tjhesa. Phutheho ya Laodesea ya kgalemelwa ka Lentswe la Jesu Krete, e ntshwa bo-fofong. Ha e-ya tshwanela hore e ka hloka sebopeho sa hore ke phutheho ya Jesu Krete. Lerato la Jesu Krete ho phutheho ya hae le bonahetse, sefapanong Golgotha. Madi a hae a ile a tsholoha. O ile a shwela baetsadibe bohle, e le hore e mong le e mong ya dumelang ho yena, a tle a se ke a timela, a tle a hauhelwe, a tshwarelwe dibe tsa hae, mme a kentshwe mmusong wa Modimo o sa feleng.

Phutheho ya Modimo motho ya dumetseng ho Jesu Krete wa kgalemelwa kajeno, motho ya kolobeditsweng, ya hlomamisitsweng, ya jang Selallo se halalelang, le yena wa kgalemelwa. Lerato la hae ho Jesu Krete ha lea tshwanela hoba fofo, ha lea tshwanela ho hloka sebopeho. Ha lea tshwanela ho batla, jwaleka la mohedene, la motho ya se tsebeng Modimo. Le tshwanetse ho tjhesa. Lerato le tshwanang le la Morena Jesu Krete sefapanong Golgotha, ha a shwela baetsadibe bohle, le tshwanetse ho bonahala ho bao e leng ba Morena Jesu.

Motho ya dumetseng ho Jesu Krete ha a tshwanela hoba jwaleka lempetjhe hoba le dibopeho tse ngata tse sa tshwaneng. Moapostole Pauluse o re tumelo ho Jesu Krete ha e sa pakwe ke mesebetsi e metle yeo motho a e etsang ho tshwana leha e itjhweletse. Phutheho ya Laodesea e ile ya tsoswa bo-fofong ba yona ka ho eletswa hore e be le tumelo ya nnete ho Jesu Krete, hape e apare toka le kgalalelo ka dinako tsohle e leng dintho tseo Jesu Krete a ba fumanetseng tsona ka madi a hae a tsholohileng sefapanong. O ba neile le wona Moya o Halalelang hore o tle o bule mahlo a bona ba tle ba bone nnete mme ba dule ho yona, e ba tataise.

Phutheho ya Modimo le rona re ngoletswa lengolo lena hore re tle re seke ra hloka sebopeho sa hoba ba-Kreste, jwaleka Laodesea. Ha re nkeng gauda e leng tumelo hore re tle re tsebe ho phela jwaleka badumedi, le setlolo ho tlotsa mahlo a rona a fufetseng, re tle bone nnete le ho dula ho yona. Ha re apareng diaparo tsa toka le kgalalelo tseo Morena Jesu Krete a seng a re lefeletse tsona ka lefu la hae sefapanong. Ha re baleheleng hoba phutheho e fofo jwaleka Laodesea. Jesu Krete o re tsositse borokong bo jwalo, mme o re kgalemetsa ka Lentswe la hae le pholosang.

Lerato la hae ho rona bohle ba dumetseng ho yena ebile le tjhesang, ha a re shwela dibe mane sefapanong Golgotha. Ha lea ka la e-ba fofo la hloka sebopeho. Ha e mong le e mong wa rona lerato la hae le tjhesa le la phutheho le tla tjhesa, le tjhesehele mosebetsi wohle wa Modimo lefatsheng. Morena a ke a re thuse lerato la rona le ke le tjhesa ho tshwana le la Jesu.

Amen.

BALA: TSHENOLO 20:11–15

TEMANA: 12,15

(20) KA NTOO BONA BAFU BA BANYENYANE LE BA BAHOLO BA EME PELA TERONE, HA PHETLWA DIBUKA, HA PHETLWA LE BUKA E NNGWE E LENG BUKA YA BOPHELO. MME BAFU BA AHLOLWA KA TSE NGODILWENG DIBUKENG TSEO, E LENG KA MESEBETSI YA BONA.

(15) MME E MONG LE E MONG YA SA KANG A FUMANWA A NGODILWE BUKENG YA BOPHELO A AKGELWA LETSHENG LA MOLLO.

Taba ya rona ya sehlooho moo re badileng teng ke:

KAHLOLO YA LETSATSI LA BOFELO

Dintlha di pedi tsa bohlokwa tseo re tshwanetseng ho di tadima sehloohong sena ke:

(a) Dibuka tse ileng tsa phetlwa.

Buka ke ntho yeo re e tsebang. Ha ho ntlo e hlokang buka. Re sebedisa dibuka malapeng a rona le dikolong re bala dibuka tse rutang bana le batho ba baholo. Le kerekeng re bala dibuka tse rutang batho ka thuto ya Modimo. Motse o mong le o mong o na le ntlo ya polokelo ya dibuka tsa setjhaba. E bitswa: *"PUBLIC LIBRARY"*

Bangodi ba dibuka ba ngola ka batho, diphoofolo, dimela le ka ntho e nngwe le e nngwe e teng lefatsheng. Dibuka ha di balwa di re hlalose tsa kamoo batho ba teng lefatsheng ba phelang kateng, le ba phetseng pele lefatsheng kamoo ba neng ba phela kateng. Le yona buka ya Modimo re na le yona, re e ngoletse. E re hlalose tsa hore Bibe le Lentswe la Modimo.

E ngotswe ka TSHUSUMETSO YA MOYA O HALALELANG

Bangodi ba Bibe ba ne ba sa ngole maikutlo a bona, empa MOYA O HALALELANG WA MODIMO O NE O BA HULA HO BA NGODISA SEO MODIMO O SE BATLANG. Ke ka lebaka lena re bitsang Bibe *"LENTSWE LA MODIMO"* Bibe le hlalosa Modimo hore ke: "MOYA". Ba rapelang Modimo, ba o rapele ka MOYA le NNETE.

Temana ya rona e re:

(a) DIBUKA DI ILE TSA PHETLWA:

Modimo, bukeng ya wona o ngotse lebitso la motho e mong le e mong. E moholo le e monyenyanane, mohlalefi le sethoto, morui le mofutsana, difofu le diqhwalala, dimumu le bo-ditsebe-tutu. Modimo o bopile motho ka sethswantsho sa wona. Ha dibuka di phetlwa ho tla

tadingwa mosebetsi o mong le o mong woo motho a o etsang, ka letsatsi le leng le le leng, kahobane letsatsi la kahlolo le tshabehang le fihlile. Mosebetsi woo o ne o ntse o ngolwa bukeng ya Modimo.

Hape ha dibuka di phetlwa ho tla hlahlojwa botle bo bong le bo bong, hammoho le bona bobo bo bong le bo bong boo motho a bo etsang, ka lebaka la hoba letsatsi le tshabehang la kahlolo le fihlile. Ka letsatsi leo le leholo le tshabehang la kahlolo, motho e mong le e mong o lebeletse ho amohela moputso wa bobo boo a bo entseng hammoho le wona moputso wa botle boo a bo entseng lefatsheng. Lebaka le teng la bohlokwa, ke hobane, ka bophelo bohle ba motho lefatsheng, ntho e nngwe le e nngwe ya motho, e ne e ntse e hlokomelwa ka ho ngolwa bukeng ya Modimo, e le hore bophelo ba motho e mong le e mong ya bopilweng ka setshwantsho sa Modimo, bo tle bo tsebahale ka ho nepahala.

Le wona monahano wa motho e mong le e mong, Modimo o se a ntse a o tseba, hobane motho ke sebopuwa sa Modimo. O bopilwe ka setshwantsho sa Modimo. Lentswe la Modimo le bua nnete, le nepahetse ha Modimo o re: ho Esaia 55:8,9: *“HOBANE MEHOPOLO YA KA HASE MEHOPOLO YA LONA, DITSELA TSA LONA HASE DITSELA TSA KA, EMPA JWALEKAHA LEHODIMO LE PHAHAME HODIMO HO LEFATSHE, DITSELA TSA KA DI PHAHAME JWALO HODIMO HO DITSELA TSA LONA, LE MEHOPOLO YA KA HODIMO HO MEHOPOLO YA LONA”*

Motho leha a ka bolaya kapa a lwana, a rohakana, a hana ho tshwarela melato ya bao a kileng a fapana le bona. Tseo tsohle di ngotswe bukeng ya Modimo, e le hore di tle di hopolwe. Mohla dibuka di phetlwang, kahlolo ha e se e fihlile. E mong le e mong o tla ahlolwa ho ya kamoo melato ya hae e ngotsweng kateng bukeng ya Modimo. Diphiri di tla phatlalatswa, mohla letsatsi la kahlolo, ho bafu ba baholo le ba banyenyane. Batho ba tla ahlolwa ho ya ka diketso tsa bona, hobane tsohle dia tsebahala, di ngotswe bukeng ya Modimo. Ka lebaka la ho tshabeha ha letsatsi la kahlolo, ha dibuka di phetlwa, mme molato wa e mong le e mong o balwa pepeneneng bukeng ya Modimo.

Batho ba tla qala ho rapela dithaba hore di ba wela hodimo, le hore maralla a ba pupetse. Phutheho ya Modimo, ho itokisetsa tseba tse tlang ho etsahala, tse bolelwang le lentswe la Modimo. Lona Lentswe la Modimo le tla ka keletso ena e reng ho rona: *“O MPE O HOPOLE MMOPI WA HAO MATSATSING A BOTJHA BA HAO, HO ESO HO TLE DITSHIU TSA TLOKOLOTSI, HO ESO HO FIHLE LE DILEMO TSEO KA TSONA O TLA RE: “HA KE SA KG AHLISWA KE TSONA”* (MOEKELESIA 12:1). Hape lona Lentswe le re fa o batla mmuso wa Modimo le ho loka ha wona pele. Haele dintho tse ding tsohle re tla di ekeletswa.

Re tla tadima jwale seo ntlha ya rona ya bobedi e se bolelang ka:

“BUKA YA BOPHELO”

Kantle ho dibuka tseo di ileng tsa phetlwa mohla letsatsi le leholo le tshabehang la kahlolo, re bolellwa ka buka e nngwe e bitwang *“BUKA YA BOPHELO”* Ena buka ya bophelo, ha e tshwane le dibuka tse ding tse ileng tsa phetlwa. Mabitso a bana ba Modimo ho buka ena ya bophelo ke a ngotsweng ka madi a Jesu. Re ka hlalosa mabitso ana a ngotsweng ka madi a Jesu hore ke a:

(i) **DITHO TSE TLETSENG TSA KEREKE**

Bao ba kolobeditsweng, esale ba banyenyane esita le bona ba kolobeditsweng ba se ba hodile.

- (ii) Hape ho bolelwa le ka bona batho ba hlomamisitsweng, hammoho le bona ba buseditsweng ditulong tsa bona, ha ba ne ba wele. Ha ho bolelwa ka ditho tse tletseng tsa kereke, ho akaretswa le bona bohle ba nang le tokelo ya ho ja Selallo se Halalelang.

Temana ya rona e re: *"MME E MONG LE E MONG YA SA KANG A FUMANWA A NGODILWE BUKENG YA BOPHELO, A AKGELWA LETSHENG LA MOLLO"*

Lentswe le bolela hore BUKA ENA YA BOPHELO e ngotswe ka madi a MORENA JESU. Ke mabitso a bana ba Modimo a ho yona. Bao mabitso a bona a seng teng bukeng yeo, ba tla akgelwa letsheng la mollo (Tshenolo 20:15).

Jwale re tla tadima mesebetsi ya bana ba Modimo ba ngotsweng bukeng ena ya bophelo ka madi a Morena Jesu. Phapang e teng e bonahalang ho bona le ho batho ba sa ngolwang bukeng ena, ke hobane ba ngotsweng ka madi a Jesu, ha ba entse sebe, ba tseba ho inyatsetsa sebe seo ba se entseng, ho Modimo. Dibe tsohle tsa bona ba di swabela. Diketso tsa bona tse mpe ba di swabela. Ba kopa ho Modimo ka thapelo hore o ba tshwarele dibe tsa bona tse mpe tseo ba di entseng.

Hape-hape, seo re se hlokometseng ka batho bana ba takilweng ka madi a Jesu. Ha ba utlwa Lentswe la Modimo, ba le amohela, ba dumela ho lona, ba sokoloha, ha ba na manganga. Ba dumela hore Jesu ke Mora wa Modimo, ya neilweng matla ohle lehodimong le lefatsheng. Matla a ho tshwarela baetsadibe dibe tsa bona, le ho ba kentsha mmusong wa Modimo o sa feleng. Phapang e nngwe yeo re e bonang mahareng a bana ba Modimo ba ngotsweng bukeng ya bophelo ka madi a Morena Jesu le bao mabitso a bona a sa ngolwang.

BA NGOTSWENG ba dumela ruri hore Bible le LENTSWE LA MODIMO, le hore tsohle tse ka hare ho yona ke nnete. BA SA NGOLWANG: ke batho ba phelang hampe, jwaleka haeka Modimo o ke ke wa ahlola mesebetsi e mebe yeo ba e etsang. Ha ba susumetswe ke MOYA WA MODIMO ho etsa mosebetsi wa Modimo. Ntho e nngwe le e nngwe ba e etsa ka ho rata, ba sa rutwe ke Moya o halalelang. Ke ka lebaka lena Lentswe la Modimo le reng: *"HASE BOHLE BA RENG HO NNA: MORENA, MORENA, BA TLANG HO KENA MMUSONG WA MODIMO, EMPA HO TLA KENA YA ETSANG THATO YA NTATE YA MAHODIMONG"* (MATTHEU 7:21).

Morena a ke a re thuse bohle ho itokisetša ho kopana le Morena Jesu Krete mohla letsatsi la kahlolo.

Amen.

BALA: MAREKA 5:1–13

TEMANA: 8,9

- (8) HOBANE JESU O NE A RE HO WONNA: TSWA MOTHONG YEO, MOYA O DITSHILA (MAREKA 5:8).
- (9) JESU A BOTSA A RE: LEBITSO LA HAO O MANG? WA ARABA WA RE HO YENA: LEBITSO LA KA KE LEGIONE, HOBANE RE BANGATA (MAREKA 5:9).

“TSWA MOTHONG YEO, MOYA O DITSHILA” Ha Morena Jesu a fihla motseng wa Ba-Gerasene o ile a kopana le monna ya nang le moya o mobe, o ditshila. Moya ona o mobe o ditshila, woo re o bitsang Diabolose kapa Satane o bopilwe ke Modimo, pele Modimo o bopa motho. O ile wa bopa meya e lokile, jwaleka yena motho ha ile a bopjwa a lokile, a hloka sebe. Adama le Eva ka lebaka la ho thetswa ke Diabolose-Satane, hore ba se ke ba hlomphe Modimo, ba ile ba fetoha baetsadibe, ka ho tlola molao wa Modimo.

Ba ne ba bopilwe ka setshwantsho sa Modimo, e le hore Moya wa Modimo o tle o utlwane le moya wa motho. Empa motho a qhekanyetswa ke moya o mobe, o ditshila wa Diabolose, hore a se ke a mamela Lentswe la Modimo. Meya e mebe e ditshila e ile ya tsohela Modimo matla. Yaba Modimo wa e leleka lehodimong, jwaleka yena Satane ha e ne e le lengeloi la Modimo. O ile a lelekwa lehodimong ka lebaka la ho se hlomphe Modimo.

Re fumantshwa ditaba tsena hantle bukeng ho (Juda 1:6) hore: “Mangeloi a sa kang a tiisetsa boholong ba wona, a mpa a tlohile tulong tseo e neng e le tsa wona, a bolokilwe ditlamong tse sa feleng le lefifing, ho lebella kahlolo ya letsatsi le leholo teng. Morena Jesu ha a tla fodisa monna motseng wa ba-Gerasene ya neng a kenwe ke meya ena e mebe e ditshila. O bone kamoo monna enwa a neng a sotleha kateng. O ne a phela dithabeng le mabitleng. A tshwana le lehlanya. A tabola diaparo, leha di le telele di kwahetse mmele wa hae. Bohlanya bo ne bo etsa hore a rate ha di le kgutshwanyane. Ka matsatsi a mang o ne a hlile a rata ho tsamaya a tsotse. O ne a roba mahlaahlela a mo tlamileng le ditshepe a di tula a di roba.

O ne a dula a hweletsa bosiu le motsheare, jwaleka mahlanya ha a tswa ho etsa . Satane leha a se a senyehetswe ke mosebetsi wa hae wa hoba lengeloi lehodimong, ka lebaka la ho se hlomphe Modimo. Re hlokomela hore leha a se a le mona lefatsheng, a lelekilwe lehodimong, o ile a futuhela Morena Jesu ha a le feelleng a mo leka a re: *“Ha o le Mora Modimo, e re majwe ana a fetohle mahobe”* (Mattheu 4:3). Empa Morena Jesu a mo araba a re: ho ngodilwe ho thwe: *“Motho a ke ke a phela ka bohobe feela, empa o tla phela le ke polelo tsohle tse tswang molomong wa Modimo”* (Mattheu 4:4).

Phutheho ya Modimo, temana ya rona e re: Morena Jesu ha a fodisa monna motseng wa ba-Gerasene o re: *“TSWA MOTHONG YEO, MOYA O DITSHILA”* (Mareka 5:8). O tswela-pele

Morena Jesu o re: "LEBITSO LA HAO O MANG?" Wa araba wa re ho yena: "LEBITSO LA KA KE LEGIONE, HOBANE RE BANGATA" (Mareka 5:9). Ka lentswe la hae feela Morena Jesu o ile a leleka batemona bao, batemona ba kena mohlapeng o moholo wa dikolobe, o neng o fula dithabeng. Dikolobe tsa itihela lewatleng, e le dikete tse pedi, mme tsa bipelwa lewatleng. Morena Jesu a fodisa monna motseng wa Gerasene. Moya o mobe o ditshila o neng o mo kene, wa fela wa tswa ho yena.

Taelo ya Morena Jesu ho ya neng a kenwe ke batemona ba Legione ke hore *"EYA HAE, HAENO, HO BANABENO, O BA TSEBISE TSE KGOLO TSEO MORENA A O ENTSENG, TSONA KAMOO A O UTLWETSENG BOHLOKO KATENG"*.

Baratuwa Moreneng, re a hopotswa hore Morena Jesu ke mora Modimo. O neilwe borena bohle lehodimong le lefatsheng. Ha a phekole feela malwetse a mefuta-futa a tshwereng batho ba le meya ena e mebe, e ditshila bademona ba Legione, empa o tshwrela baetsa-dibe dibe tsa bona, ha ba dumela ho yena. Ke ngaka e kgolo e fetang dingaka tseo re nang le tsona lefatsheng, kahobane yena ha ho na bolwetse bo mo hlolang.

Ke motho wa nnete hape ke Modimo wa nnete. Ha a ne a fodisa monna wa mo-Gerasene ya neng a kenwe ke meya e mebe e ditshila, bademona ba Legione o re: TSWA MOTHONG YEO, MOYA O DITSHILA" O laela meya e mebe ho tswa ho mokudi ha a kope. Ha a botsa a re: LEBITSO LA HAO O MANG?

KARABO e re: "LEBITSO LA KA KE LEGIONE" hobane re bangata. Ke karabo ena, hlaloso e bolela hore moya ona o mobe, one o tlamilwe ka mahlaahlela a meya e mengata e mebe, e ditshila.

Baratuwa Moreneng le mehleng ena ya rona kajeno Jesu mora Modimo o ntse a mema batho bohle hore ba tshwerweng ke meya e mebe e ditshila ya bademona, empa le bona ba tshwerweng ke ditsietsi tsa mefuta-futa, tseo ba sitwang ho di rarolla. O re

"TLONG HO NNA LONA BOHLE BA KGATHETSENG, BA IMELWANG, MME KE TLA LE IMOLLA, INKELENG JOKO YAKA. MME LE ITHUTE HO NNA, HOBANE KE MOSA LE PELO E NOLO, ME LE TLA FUMANELA MEYA YA LONA PHOMOLO" (Mattheu 11:28,29).

Le rona bohle re laelwa ho phatlalatsa Lentswe la Modimo, ho bolela ka tsa thuso yeo Morena Jesu a re etseditseng yona, eseng feela ka ho re phekola meya e mebe e ditshila e neng e re kene. Meya e mebe ya dibe tsa rona e kang ena:

- (a) MAHLOYO
- (b) DINTWA
- (c) DIPOLAYANO
- (d) MEFERE-FERE KA DIKEREKENG LE
- (e) DIPETO HO BANA LE HO BATHO BA BAHOLO.

Ha ho motho ya ka hlolang tsohle tseo re seng re di boletse kantle ho Jesu Krete mora Modimo o phelang. Yena ya hlotseng Satane, lefu le lebitla. Morena a ke a re thuse ho phatlalatsa Lentswe la Modimo, ho bolela dintho tsohle tse ntle tseo Morena Jesu Krete a re etseditseng tsona bophelong ba rona lefatsheng.

Amen.

BALA: JOHANNE 5:37–40
TEMANA: 39–40

LE BOTSISISA MANGOLO, KAHOBANE LE LEKANYA HORE LE NA LE BOPHELO BO SA FELENG HO WONNA, ATHE KE WONNA A MPAKANG. EMPA HA LE RATE HO TLA HONNA LE TLE LE BE LE BOPHELO.

Bajode ba ne ba batla bophelo bo sa feleng, empa ba ne ba sa bo fumane. Bophelo bo sa feleng e ne e le hore motho a tsebe Modimo. Modimo o tlisa bophelo ba nnete pelong ya motho. Moya o Halalelang, ha o dula pelong ya motho, o hlwekisa bobele bohle bo ka pelong. Re tla tadima hlooho ya ditaba tsa rona e le:

“KAMOO BAJODE BA NENG BA BATLA BOPHELO BO SA FELENG KATENG”

Petrose o re ruta hore motho ha a batla bophelo bo sa feleng o tshwanetse ho bala Biblele yohle. Testamente e ntjha le yona a e bale, hammoho le yona ya kgale. Haele Bajode ba ne ba bala feela Testamente ya kgale.

Ba ile ba ipatlela feela melao ya Moshe hore ba tle ba e boloke, ba tle ba tsebe ho fumana bophelo bo sa feleng. Ba ne ba sa rate ho utlwisisa dipolelo le ditaba tsa Jesu Krete. Ba ne ba batla Krete yeo ho ya ka bona, e tshwanetseng ho ba Morena wa lefatshe lena. Krete, o tshwanetse ho ba monna ya matla ya tlang ho bolaya dira tsa bona, le ho di utlwisisa bohloko. Melao ya Moshe ba ne ba e tseba hape ba ne ba e utlwisisa. Kamorao hore ba batlisisa Biblele ba ile ba leka ho iphumanela bophelo bo sa feleng, empa ba ile ba sitwa ho bo fumana.

Tabeng ya rona ya pele re tla utlwa ha Morena Jesu a hlalosa kamoo bophelo bo sa feleng bo tshwanetseng ho fumanwa kateng.

(A) BOPHELO BO SA FELENG BO HLAOSWA KE MORENA JESU.

Morena Jesu o re motho ya batlang bophelo bo sa feleng o tshwanetse ho bala le ho mamela Biblele, e seng ho batla dintho tsa pelo ya hae. Johanne o re bolella hore ha Modimo o bopa lehodimo le lefatshe, Jesu o ne a se a ntse a le teng. Ha Adama a tloa molao wa Modimo ka ho etsa sebe Paradeising, Modimo o ile wa tshepisa ho romela Jesu Krete lefatshe. Ke yena ya tla tla ho tla ripitla hlooho ya noha. Hona ke ho bolella hore o tla tla ho tla hlola Satane. Ha re bala ho (Genese 3:15) re fumana mantswe a reng:

“KE TLA BEYA HLOYANO MAHARENG A HAO LE MOSADI, LE MAHARENG A PEO YA HAO LE PEO YA HAE, PEO YEO E TLA O KGOBA HLOOHO, MME O TLA E LOMA SERETHE”.

Ha Modimo o ne o bolella hore ditjhaba tsohle di tla fumana mahlohonolo molokong wa Abrahamama, o ne a bolella ka Morena Jesu. Moshe, ha a ne a bua moprofeta e moholo ya tla tla

lefatsheng, o ne a bua ka Morena Jesu. Hare bala ho (Deuteronomi 18:18) re fumana mantswa a tshehetsang taba ena, mme a baleha tjena: *“KE TLA BA HLAHISETSA MOPOROFETA YA TSWANG HARA BANABABO BONA, YA JWALEKA WENA, KE TLA BEA MANTSWE A KA MOLOMONG WA HAE, MME O TLA BA BOLELLA TSOHLE TSEO KE TLA MO LAELA TSONA”*.

Ha ho ne ho buuwa ka madi a mahlabelo, ho ne ho buuwa ka madi a Jesu Krete, ya ileng a re shwela dibe. Ha re bala Testamente ya Kgale yohle, re hlokomela hore Modimo o nnile wa etsa ditshepiso tsa wona tsa hore Jesu Krete o tla tla lefatsheng. Ho thata ho motho ho itefella dibe tsa hae. Re tla sitwa ho etsa jwalo. Empa yena Jesu Krete o tla tla, ho re lefella tsona. Haele Isaia yena o ile a bolela mabitso a Morena Jesu.

Re tla hlokomela nnete ya taba ena, ha re bala (Isaia 9:6) ka mantswa a reng: *“HOBANE RE TSWALETSWE NGWANA, RENEILWE MORA, BORENA BO BEILWE LEHETLENG LA HAE MME O TLA BITSWA:*

- (a) MOELETSI YA MAKATSANG.
- (b) MODIMO O MATLA
- (c) RABOSAFELENG
- (d) MORENA WA KGOTSO

Hape-hape Isaia o boletse hore Morena Jesu o tla utlwiswa bohloko. Hare bala (Isaia 53) re tla fumana nnete ya taba ena, ka mantswa ana: *“O NYATSITSWE A FURALLWA KE BATHO, KE MOTHO WA MAHLOKO YA TSEBANG MAHLOMOLA”* (Isaia 53:3) Haele MIKEA yena o boletse moo Morena Jesu a tla tswallwa teng. Mantswa a tshehetsang taba ena ke ana: *EMPA, HA E LE WENA, BETHLEHEMA-EFRATA LEHA O BALWA O LE MONYENYANE HARA MELOKO YA JUDA, HO WENA HO TLA NTSWELA YEO E TLA BA MORENA WA ISERAELE, E LENG YENA YA LENG TENG, ESALE TSHIMOLOHONG, ESALE MEHLENG E SA QALENG (MIKEA 5:2).*

Phutheho ya Modimo, rea hlokomela hore ha re ntse re bala Bibeletse Morena Jesu Krete re mo fumana melaong yohle, le historing ya baporofeta le marena. Testamente yohle ya Kgale e bua ka yena. Re tla kena jwale ntlheng ya bobedi e balehang tjena:

- (B) *KE SEFE SEO RE TSHWANETSENG HO SE BATLA HO FUMANA BOPHELO BO SA FELENG.*

Bajode ba ne ba batla moputso wa bophelo bo sa feleng, ka lebaka la hobane ba ne ba bolokile melao hantle ya Moshe. Bane ba tadima diaparo tseo motho a di aparang. Ba apara diaparo tse ikgethileng, ba ja dijo tse ikgethileng. Empa, haele bophelo bo sa feleng, ba ne ba sa bo fumane.

Morena Jesu o ile a bitsa motho e mong a re ho yena: *“NTATELE”* Karabo ya hae o re: *“MORENA NTUMELLE, KE YE HO EPELA NTATE PELE”* KARABO ya Morena Jesu ho yena o re: *“LESA BAFU BA EPELE BAFU BA BONA”*

Mantswa a Morena Jesu Krete a bontsha kgalemelo e matla hammoho le yona kgalefo. Lehoja mabaka a monna e-nwa a tadimeha e le a nnete a a ho ya pata Ntata`e, kgalemelo ya Morena Jesu e re bontsha pelaelo ya ho hloka nnete ha monna enwa. Phutheho ya Modimo, ha re tadima bophelo ba monna wa Modimo ho tsena tsa tumelo, re fumana batho ba bangata ba balehela mosebetsi wa Modimo ka ho hlahisa mabaka ao a seng a nnete jwaleka monna e-nwa

ya kopang Morena Jesu, tumello ya ho ya pata Ntata`e pele, kamorao, a tle a tsebe ho phetha thato ya Modimo, kapa thomo ya ho ya o sebeletsa.

Ee, ho jwalo baratuwa Moreneng, le mehleng ena ya rona, mosebetsi wa Modimo o ntse o tsamaya hantle jwaleka mehleng ya Morena Jesu. Mekgwa ya batho ya bolotsana ya tshwana. Re fumana batho ba hlahisang mabaka a boiketsiso, ha ba tshwanetse ho phetha mosebetsi wa Modimo. Mohlomong motho enwa o qenehetse ho ya moketeng wa boithabiso, jwale o hlahisa boitshireletso kapa boikemelo bo tadimehang e le ba nnete. Ketso e tshwanang le ena, e thibela tswelo-pele ya mosebetsi wa Modimo.

Karabelo ya badumedi ba bangata kajeno ya ho se phethe pitso ya Modimo ha ba bitswa kapa ba rongwa. E mong o re:

“MAFU A NE A LE MANGATA AO KE TSHWANETSENG HO YA HO ONA”

E mong ena o re:

“KE NE KE KULA, KAPA KE NE KE ILE MOSEBETSING”

Mohlomong dipolelo le dikarabelo tsa batho ba bang hase tsa nnete. Ho batho ba bang, mohlomong ke tsa nnete. Phutheho ya Modimo, ha re amoheleng dipolelo le dikarabo, hobane ha re na bopaki ba hore ke tsa nnete kapa hase tsa nnete. Empa taba ha e bolelwa ke Modimo mangolong a Halalelang. Ha re e amoheleng e le nnete. Ha re kgalemelaneng, empa re se ke ra potlaka ho AHLOLA ha bopaki ba nnete bo se teng, kapa bo sa bonahale YA NANG LE KAHLOLO YA NNETE KE MODIMO FEELA.

Ke Modimo o reng: “DI LESENG DI HOLE HAMMOHO DI TLA BONWA MOHLA WA KOTULO. (MATTHEU 13:30). Phutheho ya Modimo re utlwile lentswe la Modimo mabapi le bajode ba neng ba batla bophelo bo sa feleng empa ba sa latele Jesu Krete, mme ke lona lebaka le leholo leo ba sa kang ba fumana bophelo bo sa feleng. Jesu Krete o re ke yena tsela, nnete le bophelo. E mong le e mong ya dumelang ho yena o tla fumana bophelo bo sa feleng. Ha re dumelang ho Jesu Krete o ntse a re mema a re: *“TLONG HO NNA LONA BOHLE BAKGATHETSENG BA IMELWANG KE TLA LE IMOLLA”*.

Amen.

BALA: BA-EFESE 6:11–18

TEMANA: 11,17–18

- (11) APARANG DIHLOMO TSOHLE TSA MODIMO, LE TLE LE TSEBE HO HLOLA DIHLOHO TSOHLE TSA DIABOLOSE
- (17) RWALANG HELEMETE YA POLOKO, MME LE TSHWARE LERUMO LA MOYA, E LENG LENTSWE LA MODIMO.
- (18) LE RAPELE KA MOYA KAMEHLA, KA MERAPELO YOHLE, LE FADIMEHELE TENG KA TISETSO YOHLE, MME LE RAPELLE BAHALALEDI BOHLE.

Moapostole Pauluse ha e le motshwaruua mane teronkong Roma, o ile a ngola ka dihloho kapa dibetsa. A re: *“APARANG DIHLOMO TSOHLE TSA MODIMO”* Le hoja a ne a le tlung ya hae, empa o ne a katilwe, a lebetswe ke lesole ka letsatsi le leng le le leng. Pauluse ha a bona diaparo tsa lesole lena le dibetsa tseo lesole le di tshwereng, o ile a nahana ka dihloho le diaparo(uniform) tse lesole le tshebeletsong ya Modimo ka kerekeng le ka di aparang. Ke yona taba e ileng ya mo susumetsa ho ngola lengolo lena.

Taba tsa bohlokwa tseo re di tadimang ke tsena tse latelang:

- (a) NTWA YA BA-KRESTE le
(b) DIHLOMO TSA NTWA

(a) NTWA YA BA-KRESTE: Ha re tadima mane Paradeising, moo batho ba pele Adama le Eva ba neng ba phela teng. Satane o ile a ba lwantsha hore ba tle ba se ke ba hlomphe Modimo. Ntwa e ile ya hlola Adama le Eva, yaba ba tlola molao wa Modimo, ka ho ja sefate sa tsebo ya botle le bobele. Empa Jesu Krete yena o ile a hlola Satane. Ke ka lebaka leo hangata a bitswang Adama wa bobedi. Ka mokgwa o jwalo, Morena Jesu o re hloletse ntwa. Re masole a Jesu. Re lebotho la hae la ntwa. Ke ka lebaka leo kereke yohle e ntseng e le tseleng ya ntwa. Re lwana hore re tle re be re hlole diabolose ho isa lefung.

Lentswe la Modimo le laela masole ohle a Morena Jesu le re: *“Aparang dihloho tsohle tsa Modimo, le tle le tsebe ho hlola matla ohle a Diabolose”* (Ba-efese 6:11).

“Tshwarang lerumo la moya e leng Lentswe la Modimo” Hape-hape masole a tshwanetse ho rapela ka moya le ka nnete ka dinako tsohle. Phutheho ya Modimo ha re tiisetsa thapelong, re e fadimehela. Re tla utlwisisa hore yeo re buang le yena ke Modimo o matla ohle, re tla tseba ho ka hlola matla ohle a Diabolose. Jwale re tla tadima taba ya:

- (b) DIHLOMO TSA NTWA:

Morena Jesu ha a batle ha masole a hae a kena ntweng a se na dihlobo tsa ntwaka kapa tsona dibetsa. Ke ka lebaka leo taelo ya Lentswe la Modimo e reng ho masole ohle a Morena Jesu: *“Aparang dihlobo tsohle tsa Modimo, le tle le tsebe ho hlola matla a Diabolose”*. Ke yena Morena Jesu ya fanang ka dihlobo tsa ntwaka. Taelo ho rona e re, re itlame matheka ka senyepa (lebanta) sa nnete. Ha re ka dula nneteng kamehla ra ba le yona, re tla hlola Satane hobane ke Ntata bohle ba buang leshano.

Ha re beng le mafolo-folo a ho phatlalatsa Evangedi ya Jesu Krete ho ba sa tsebeng ditaba tsa Modimo. Ha re rwaleng helemete (katoba) hloohong, ka hona re paka kapa ho tiisa hore ke Jesu Krete ya re fileng pholoso ka ho re shwela dibe sefapanong Golgotha, mme o re sietse bophelo bo sa feleng ha re dumela ho yena. Baena le dikgaitsemi, ditemana tseo re di badileng, di re supisitse hantle hore re masole a Jesu Krete a tshwanetseng ho lwantsha masole a Diabolose bosiu le motsheare, ka dinako tsohle ho isa lefung.

Jwale ka masole re apere diaparo.

- (i) Hlohong re laetswe ho rwala Helemete (KATIBA) ya poloko.
- (ii) Maotong re laetswe ho rwala mafolo-folo a Evangedi ya kgotso.
- (iii) Re laetswe hape ho itlame matheka senyepa (LEBANTA) sa nnete.
- (iv) Hape-hape re tshware: (LERUMO LA MOYA) e leng: (LENTSWE LA MODIMO). Taelo e tswela-pele e re:
- (v) Re rapela ka MOYA kamehla. Ka hodima tseo tsohle, taelo e tswela-pele e re:
- vi (TSHWARANG THEBE YA TUMELO)

Phutheho ya Modimo, ho hlakile hore re masole a Morena Jesu Krete. Ha re lwantsheng sera, e leng Diabolose ka dithapelo. Ha re raoheng, ntwaka ya lwana, re apareng dihlobo tsohle (DIBETSA) tsa Modimo, re tle re tsebe ho hlola sera e leng Diabolose, le matla ohle a hae. Ditemaneng tseo re di badileng ho Ba-efese kgaolong ya botshelela (6) Lentswe la Modimo le re laela ho apara dihlobo tsohle tsa Modimo. Teng re bontshitswe ka ntwaka ya ba-Krete ho tloha tshimong ya Edene, Paradeising, ho Adama le Eva. Satane o ile a hlola ntweng yeo. A qhekanyetsa Adama le Eva ka mashano, jwaleka ha e le ntata bohle ba phelang ka leshano mano.

Adama le Eva, yaba ba tloa molao wa Modimo. Jwale Modimo wa romela Jesu Krete. Jesu o hlotse Satane ntweng yeo. Le rona phutheho ya Modimo jwaleka masole a Jesu Krete re bontshitswe ka ntwaka ya ba-Krete yeo re tshwanetseng ho e lwana, le tsona dihlobo tsa ntwaka re di bontshitswe tseo re di filweng ke Jesu Krete hore re tle re tsebe ho hlola matla ohle a Diabolose. Ha re rapelang Morena Jesu ka matla le kamehla, a tle a tsebe ho re thusa ntweng ena. Ka Jesu Krete Morena wa rona.

Amen.

BALA: DIKETSO 1:4–11 LE DIKETSO 2:1–8
TEMANA: DIKETSO 1:8 LE DIKETSO 2:4

DIKETSO 1:8 EMPA LE TLA FUWA MATLA MOHLA MOYA O HALALELANG O TLANG HO LONA, MME LE TLA BA DIPAKI TSA KA JERUSALEMA, LE NAHENG YOHLE YA JUDEA, LE YA SAMARIA, LE HO ISA PHELETSONG YA LEFATSHE.

DIKETSO 2:4 MME BOBHLE BA TLALA MOYA O HALALELANG, KAMOO MOYA O BA BUISANG KA TENG.

Ditemana tseo re di badileng di bua ka tshollo ya MOYA O HALALELANG MOHLA letsatsi la PENTAKONTA. Hlooho ya ditaba tsa rona ke hore: MOYA O HALALELANG O TSHOLLETSWE BATHO BOHLE.

- (1) Re tla hlahlobisa tabeng ya pele ka tsa: TSHEPISO YA MOYA O HALALELANG
- (2) Tabeng ya bobedi re tadime ka tsa: MATLA A MOYA O HALALELANG

(1) TSHEPISO YA MOYA O HALALELANG: Pele Modimo o tshollela MOYA wa wona o HALALELANG ho setjhaba sohle sa wona lefatsheng ka letsatsi la PENTAKONTA. Banna ba Modimo ba kang bo-Moshe, ba kile ba lakatsa eka setjhaba sohle sa Modimo se ka porofeta. Re utlwa mantswe a Moshe ha a re:

“O HOJA SETJHABA KAOFELA SA JEHOVA SE KA FELA SA POROFETA”

Re bala jwalo ho (Numeri 11:29). Hape-hape re utlwa ka tshepiso ya MOYA O HALALELANG ha Modimo o bua ka moporofeta Joele o re:

- (17) MEHLENG YA BOFELO HO BOLELA MODIMO *“KE TLA TSHELA NAMA YOHLE KA MOYA WA KA, BARA BA LONA LE BARADI BA LONA BA TLA POROFETA, BA BATJHA BA LONA BA TLA BONA DIPONO, MME MAQHEKU A LONA A TLA LORA DITORO”*
- (18) MEHLENG YEO, *KE FELA KE TLA TSHELA BAHLANKA BA KA BA BATONA LE BA BATSHEHADI KA MOYA WA KA, MME BA TLA POROFETA”*

Re bala jwalo ho DIKETSO 2:17,18

Ho ya ka moo Lentswe la Modimo Bibeleng le re rutang ka teng re hlokometse hore: TSHOLLO YA MOYA O HALALELANG e boletse pele e etsahala, re bala jwalo TESTAMENTENG YA KGALE esita le hona TESTAMENTENG E NTJHA. Ha a bolella barutuwa ba hae, Morena Jesu o re:

(16) KE TLA RAPELA NTATE, MME O TLA LE NEA MOEMEDI E MONG, A TLE A DULE LE LONA KA HO SA FELENG.

(17) KE HORE: *"MOYA WA NNETE, WOO LEFATSHE LE SA TLOHA LE O TSEBE, EMPA LONA LE A O TSEBA, HOBANE O DULA LE LONA, MME O TLA BA KA HO LONA"*

Re bala jwalo ho (Johanne 14:16,17). Phutheho ya Modimo e ratehang, re hlokometse hore ke nnete hore tshepiso ya tshollo ya MOYA O HALALELANG e boletswe pele PENTAKONTA e fihla. Ka nyolohelo ya hae lehodimong, ho phethahetse seo Morena Jesu a se boletseng barutuwa ba hae bosiu pele a thakgiswa. Ha re bala ho Johanne 16:5 re fumana mantswe a balehang tjena: *"JWALE KE YA HO YA NTHOMILENG, MME HA HO E MONG HO LONA YA MPOTSANG HORE: "O YA KAE"*

Morena Jesu o rometse jwalo MOYA WA HAE O HALALELANG. Ka morao ho matsatsi a leshome a nyolohetse lehodimong, ke letsatsi la PENTAKONTA. Re tla kena jwale ntheng ya rona ya bobedi e balehang tjena:

(2) EMPA LE TLA FUWA MATLA MOHLA MOYA O HALALELANG O TLANG HO LONA: Lentswe la Modimo le re: Ba ne ba rapela. ba le pelo e le nngwe, tumelo ya bona e le nngwe. Hang-hang, ha hlaha modumo o tswang lehodimong wa tlala ntlo yohle, e mong le e mong a tlala MOYA O HALALELANG. Malakabe a mollo a ne a tadimeha a dutse hodima e mong ka maleme ao e seng a bona. Hona e ne e le pontsho e entsweng ke Modimo ya ho bontsha batho hore MOEMEDI E LENG MOYA O HALALELANG, MOYA WA NNETE, WA TJHESEHO, O SE O FIHLILE. MOYA WOO MORENA JESU A ITSENG: *"MME TSOHLE TSEO LE TLA DI KOPA KA LEBITSO LA KA, KE TLA DI ETSA HORE NTATE A TLOTLISWE KA MORA. EKARE HA LE KOPA NTHO KA LEBITSO LA KA, KE TLA E ETSA"* Re bala jwalo ho (Johanne 14:14).

Ke tla qolla ba seng bakae, ba ileng ba fumana matla ha MOYA O HALALELANG o fihla ho bona:

(a) SAMSONE ha MOYA WA MODIMO o fihla ho yena, o ile a harola tau, jwaleka ha ho harolwa potsanyane, a sa tshwara letho matsohong a hae. Re bala jwalo ho (Baahlodi :14:6)

(b) Barutuwa ba Morena Jesu, ha ba tletse MOYA O HALALELANG, ba ile ba fumana matla, ba e-ba le sebete sa ho bolela Evangedi, ba ile ba ruta ka mantswe a hlabang dipelo tsa batho.

(c) PETROSE, ha a fuma na matla a MOYA O HALALELANG, o ile a ruta batho ka lefu le ka tsoho ya Jesu Kretse. A bolella marena a setjhaba le baholo ba lseraele a re: *"HO KE HO TSEJWE KE LONA KAOFELA, LE KE SETJHABA SA ISERAELE, HORE MOTHO ENWA YA EMENG PELA LONA, O FODISITSWE KA LEBITSO LA JESU WA NASARETHA, YEO LONA LE MO THAKGISITSENG, YEO MODIMO O MPANG O MO TSOSITSE BAFUNG"* Re bala jwalo ho (Diketso 4:10).

(d) MOYA O HALALELANG, o ile wa thehela hodima baditjhaba, mohla Petrose a neng a ruta ka ditaba tsa Jesu Kreste tlung ya KORNELE. Hona e bile bopaki ba hore MOYA WA MODIMO o tsholletswe batho bohle esita le bona baditjhaba. Batho ba neng ba tsamaya le Petrose ba makaditswe haholo ke ketsahalo ena, ha ba bona neo ya MOYA O HALALELANG e tshollelwa le hodima baditjhaba. Bopaki e ne e le hobane ba ne ba utlwa

ha ba bua d

HALALELANG o tsholletswe batho bohle ba dumetseng ho Jesu Kreste. Morena a ke a re thuse ho dumela.

Amen.

BALA: BAROMA 8:33–39
TEMANA: 35

KE MANG YA TLA RE AROHANYA LE LERATO LA KRESTE NA? KAPA TLALA, KAPA BOFUMA, KAPA TIMELO KAPA LERUMO

Lengolo lena la Pauluse le ngoletswe Ba-Roma ka morao ho Kreste dilemong tsa 58. Nakong yeo musisi Roma e ne e le NERO. Monna enwa o ne a tsebahala ka puso e mpe e sehloho setjhabeng. Puso ya hae e ne e le ya dipolao ho setjhaba le ho ba habo. Mosadi wa hae o bolailwe ke yena. Haholo-holo o ile a tuma ka ho bolaya ba-Kreste. O ne a ba hlorisa. Re tla tadima (i) Boemo ba diphutheho Roma ha moapostola Pauluse a tla ngola lengolo lena. Hape re tadime (ii) Kgotso ya Jesu Kreste.

(I) BOEMO BA DIPHUTHEHO ROMA

Ha Pauluse a tla ngola lengolo lena, diphutheho tsa Roma nakong ya musisi NERO di ne di tshoswa ka lerumo, tshollo ya madi le dipolao e ne e le dintho tse tlwaelehileng. Ho ne ho rena ditsietsi le tlala mehleng yeo. Ba-Kreste ba bangata ba ne ba fanyehwa dithupeng, ba hlajwa ka marumo, hape ba tjheswa ka mollo ba ntse ba phela. Diqoso tsa mashano ho ba-Kreste di ne di le ngata. Ba ne ba qhekanyetswa ka wona hore ha ba ka fumanwa ba le molato ba tle ba bolawe.

Ke ha Pauluse qetellong ya bophelo ba hae a tla ngolla diphutheho tsa se-Kreste tse Roma. O ne a lwantsha le ona mashano ao ba neng ba a etsa, a neng a bontsha hore ba kgelohile Lentsweng la Modimo. Pauluse o re ho bakgelohi: *“PHUTHEHO KE YA KRESTE, MOTHEO WA YONA O TIILE, HO TLOHA TSHIMOLOHONG YA LEFATSHE”* Moapostole Pauluse o bontsha hantle ditemaneng tsa rona hore re bana ba Modimo, hape re majalefa a Modimo hammoho le Kreste. Re tlameletswe ho Kreste.

Ke ka lebaka leo Pauluse ditemaneng tsa rona a reng:

“KE MANG YA TLA RE AROHANYA LE LERATO LA KRESTE NA? NA A KE BOTUBO, KAPA TSIETSI, KAPA HLORISO, KAPA BOFUMA, KAPA TIMELO, KAPA LERUMO”

Phutheho ya Modimo, re ka hlalosa ditemana tsena e le sefela sa tlhoho ya tumelo. Bophelo ba Jesu Kreste lefatsheng ebile bophelo ba tsela ya mahlomola haholo-holo ha re nahana le ho tadima tsena tse latelang diketsahalo. Re ka qolla tsena:

- (a) DIHLORISO TLASA HERODA LE BO KAIFA.
- (b) MARUMO A MMUSO WA ROMA.
- (c) DIHLORISO TSA BAJODE.
- (d) DITSIETSI TSA GETHESEMANE.
- (e) MODIMO WA KA, MODIMO WA KA O NTLOHELETSENG.

Lerato le tshwanang le lena hase leo motho a ka le lebalang. Na ha re tshwengwa ke ditsietsi le dipolao tsa lefatshe lena. Mahlomola a wetseng Jesu Krete wona re ka a lebala jwang? Re tla tadima jwale ka tsa:

(II) KGOTSO YA JESU KRESTE

Morena Jesu o ile a siela baruwa ba hae kgotso lefatsheng. Re ipotsa hore na ditsietsi le tla le tshollo ya madi ka dipolao tsa marumo, dintho tsena di ka etsa hore re furalle kgotso ya Morena Jesu Krete na? Na lerato la Jesu Krete le bonahetseng sefapanong Golgotha, ha a shwela baetsadibe dibe tsa bona na, e teng ntho e ka re arohanyang le lerato le jwalo na? Moapostola Pauluse lengolong la hae ho Ba-Roma o re: "TJHEE, BANABESO, HA HO LETHO LE TLA TSEBA HO RE AROHANYA LE LERATO LA MODIMO LE LENG HO JESU KRESTE, MORENA WA RONA" (BAROMA 8:39).

Meferefere le dintwa, kगतello le ho tujwa le tsona ditsietsi di ke ke tsa etsa hore re furalle kgotso ya Jesu Krete le lerato la hae. Re rutilwe ka Lengolo la Modimo le Halalelang hore Bajuda le batho ba ditjhaba tse ding ba ile ba kopanngwa hammoho ho Modimo ka sefapano sa Jesu Krete. Hobane ke yena kgotso ya rona, e leng yena ya entseng ditjhaba tse pedi setjhaba se le seng (Baefese 2:14). Jwaleka monna le mosadi ha ba entswe nama e le nngwe, kajeno Morena Jesu o re entse kereke ya hae, eseng dikereke tsa hae. Lentswe la Morena le re kgothatsa bohle ho dudisana ka kgotso (Bathessalonika 5:13).

Baratuwa Moreneng, Morena Jesu o sietse baratuwa ba hae kgotso. A re kgotso e be le lona. E ne e le kamorao hore a shwe, mme a tsohe bafung ka letsatsi la boraro. Mane Paradeising, tshimong ya Edene, Adama le Eva ba ile ba hloka kgotso ya nnete, kamorao hore ba etse sebe, ba tlole molao wa Modimo. Ba ile ba ipatela Modimo. Kgotso ya nnete yaba siyo. Baratuwa ba Morena Jesu ba fumane kgotso ya nnete hobane jwale ba bolellwa hore ba ke ke ba hlola ba fumana lefu le sa feleng bakeng sa dibe tsa bona. Empa ba tla fumana bophelo bo sa feleng. Hobane Jesu Krete o shwetse baetsadibe bohle. Ba dumelang ho yena ba tla fumana bophelo bo sa feleng.

Ke yona kgotso ya nnete e tlisitsweng ke Jesu Krete. Ho rona batho ba phelang lefatsheng kajeno. Kgotso ya nnete ha eyo, lerato la nnete ha le yo. Batho ba hloyane, ho tletse dintwa meferefere, dipolayano. Mafatsheng a mang tlala e teng, ha ho dijo. Mafu a mangata a hlolang dingaka. Batho ba kula, ba bangata ba shwa. Mesebetsi ya hloka-hloka. Dipeto dingata ho bana, le ho batho ba baholo. Dibe tsa batho dingata. Ka lebaka la bobbe le bokgopo bo aparetseng lefatshe, tumelo ho Modimo le ho Jesu Krete ha di sa le matla ho batho ba bangata.

Phutheho ya Modimo re botswa dipotso mabapi le tsena tse etsahalang lefatsheng. Na rea hlokomela hore Modimo o ratile lefatshe hakaalo, o bile wa le tella Mora wa wona ya tsetsweng a nnotshi Jesu Krete hore e mong le e mong sefapanong Golgotha, e le hore ba dumelang ba tle ba hauhelwe, ba tshwarelwe dibe tsa bona, ba kentshwe mmusong wa Modimo o sa feleng.

Ho dintho tse etsahalang lefatsheng mona, tse ntle kapa tse mpe. Na lerato le teng le ka re arohanyang le la Jesu Krete le bonahetseng sefapanong Golgotha na? Ho dintho tse teng lefatsheng, na kgotso ya nnete re ka e fumana, e fetang yeo Jesu Krete a re sietseng yona na? Morena a re thuse hore re se ke ra fumana lerato le ka re arohanyang le la Jesu Krete. Ha re dumelang hore Jesu o re sietse kgotso ya nnete.

Amen.

BALA: TSHENOLO 1:1–7

TEMANA: 7

BONANG O TLA KA MARU, MME MAHLO OHLE A TLA MMONA, LE BONA BA MO HLABILENG BA MEFUTA YOHLE YA LEFATSHE BA TLA SWABA KA BAKA LA HAE.

Johanna mora Sebedia ha a le sehleke-hlekeng sa Patmos, Modimo o ile wa mo senolela dintho tse ngata, tseo a tshwanetseng ho di ngola hore batho ba tle ba di fumane le hona ho di tseba. O ile a phetlelwa lehodimo hore a le bone. A bontshwa le yena Jesu Krete. A senolelwa le ka tsa ho kgutla ha hae lehodimong ho tla lefatsheng. Ke ka lebaka leo a hlokomedisang batho ka tsa buka ena mme a ba bolellang hore: JESU WA TLA. O re ho batho: *“BONANG, O TLA KA MARU, MME MAHLO OHLE A TLA MMONA, LE BONA BA MO HLABILENG BA MEFUTA YOHLE YA LEFATHSE BA TLA SWABA KA BAKA LA HAE”*.

Taba ya rona ya sehlooho ke: JESU WA TLA. Taba ya pele yeo re e tadimang ke hore: (I) O kgutlela jwang lefatsheng. Taba ya bobedi ke hore: (II) O tla bonwa ke bo-mang?

JESU O KGUTLELA JWANG LEFATSHENG?

Ha Morena Jesu Krete a kgutlela lefatsheng, o tla tla ho pholosa baetsadibe dibeng tsa bona. Ha re tadima ho Tshenolo 22:20 re bala mantswe a reng: *“TLO MORENA JESU”*. Mantswe ana a kopang Morena Jesu Krete ho kgutlela lefatsheng, a bolela hantle maikutlo le tshepo ya badumedi ba bangata. Ha re boetse re bala ho tswelapele yona buka ena ya: (Tshenolo 7:17). *“Mme Modimo o tla hlakola meokgo yohle mahlong a bona”* Mona re utlwisisa hantle hore ha ho molemo o ka bang teng lefatsheng o fetang wa hore Morena Jesu Krete a kgutlele lefatsheng kahobane o tla hlakola meokgo yohle mahlong a batho.

Ha Morena Jesu Krete a ne a tlile lefatsheng lekgetlong la pele, e ne e le ho tla pholosa baetsa-

ka hara meya ya bana ba batho. Ho morui le ho mofutsana, mohlalefi le sethoto. Ditsietsi di ba tlela ka ho tshwana, leha empa e le ka mekgwa e le fapafapaneng yeo di ba hlahelang ka teng. Ke tla qolla e le nngwe feela ya ditsietsi. Ke tsietsi ya lefu. Baratuwa ba rona ba a falla mona lefatsheng. Re arohannngwa le bona ke lefu. Lefu ha le e-tla ho motho ha le mo rerise. Le nka ba baholo le ba banyenyane ka ho tshwana. Ha ho motho ya ka phelang lefatsheng ho isa ka ho sa feleng. Ke yona tsela yeo e mong le e mong wa rona a tlang ho tloha lefatsheng ka yona.

Ho jwalo baratuwa Moreneng, efela ho ka ba molemo, ha Jesu Krete a ka kgutlela lefatsheng kapele, hobane mohlala a theohang Jerusalema e motjha, lehodimong, lefu ha le sa tla hlola le e-ba teng, le bofifi bo ke ke ba hlola bo e-ba teng, leha e le ho bokolla, kapa ho lla, meokgo e ke ke ya hlola e keketla mahlong a batho. Ntsha ya rona ya bobedi e re:

(II) KE BOMANG BA TLA BONA MORENA JESU

Temana ya rona e hlalosa hantle hore Morena Jesu a kgutlela lefatsheng, mahlo ohle a batho a tla mmona. O tla bonwa pele ke badumedi ba kolobeditsweng Lebitsong la hae, bao e leng ba hae ruri. Hamorao o tla bonwa le ke bona ba mo thakgisitseng sefapanong, esita le ke bona batho bao le kajeno ba ntseng ba mo thakgisa, le bona batho ba sa rateng ho tseba letho ka yena. O tla bonwa le ke bona bahedene ba hanneng ho sokoloha le ho dumela ho yena, ba tla thothomela.

Ba bang ba tla rapela mafika hore a ba wele hodimo, kapa lefatshe le petsohe ba tsebe ho ipata. Evangedi ha e ntse e phatlalatswa ba e utlwile, empa ba hanne ho amohela Jesu Krete e le mopholosi wa bona. Bophelo ba bona lefatsheng ebile ya e-ba bo hlokang Modimo. Ho hang ha ba ka ba hlompama Modimo. Thapelo ena e memang Morena Jesu Krete e reng: "TLO MORENA JESU, TLO KAPELE, e reng a kgutlele lefatsheng kapele. Ke e bontshang hore jwale o tshwanetse ho tla ka kotulo, ho tla ahlola lefatshe, e le hore motho e mong le e mong a tle a amohela se tshwanetseng mesebetis yeo a e entseng lefatsheng e le moputso.

Lentswe la Modimo ho Johanne 3:8 le re: *"YA DUMELANG HO JESU KRESTE HA A AHLOLWE, EMPA YA SA DUMELENG O SE A AHLOTSWA, KAHOBANE HA A KA A DUMELA MORA MODIMO YA TSETSWENG A NNOTSHI, MME YA SHWETSENG BAETSA-DIBE BOHLE, E LE HORE MOETSADIBE E MONG LE E MONG YA DUMELANG HO YENA, A TLE A SEKE A TIMETSWA, EMPA A TLE A HAUHELWE, A TSHWARELWE DIBE TSA HAE, A KENTSHWE MMUSONG WA MODIMO O SA FELENG."*

Phutheho ya Modimo e ratehang, ha re hopoleng hore buka ya Tshenolo e re hlokomedisa hore re tsebe hore Morena Jesu Krete o tla kgutlela lehodimong ho tla lefatsheng. E re mahlo ohle a batho a tla mmona ba mofuta yohle ya lefatshe, le bona ba mo thakgisitseng, le bona ba hanneng ho sokoloha, ba bileng manganga, ka lebaka la menate ya lefatshe lena. Ha re dumelang ho Morena Jesu Krete, re tle re tsebe ho pholoswa dibeng tsa rona. Morena a re thuse ho etsa jwalo.

Amen.

BALA: BAHEBERU 13:1–6
TEMANA: 4

LENYALO A LE KE LE HLOMPEHE HARA BATHO BOHLE, LE DIPHATE DI HLOKE DITSHILA, HOBANE MODIMO O TLA AHLOLA BABOKI LE BAFEBI.

SONTAHA SA 41
POTSO YA 108 LE 109

MODIMO O LAELANG TAE LONG YA BOSUPA?

KARABO: HORE BOHLOLA BOHLE BO ROHAKILWE KE MODIMO

- (a) KA BAKA LEO RE TSHWANETSE HO BO HLOYA KA DIPELO TSOHLE TSA RONA
- (b) MME RE PHELE KA HLWEKO LE BOITSHWARO.
- (c) LEHA E LE LENYALONG LE HALALELANG, LEHA E LE KANTLE HO LONA.

POTSO 109 NA TAE LONG ENA MODIMO O HANELA BOHLOLA LE MANYALA A JWALO FEELA NA?

KARABO: EE
KAHOBANE MMELE LE MEYA YA RONA E LE TEMPELE TSA MOYA O HALALELANG, MODIMO O RATA HORE RE E BOLOKE KA BOBEDI KA BOHLWEKI LE KA K GALALELO. KA BAKA LEO O HANELA DIKETSO, DITEKANYETSO, MANTSWE.

- (a) MENAHANO LE DITAKATSO TSOHLE TSA BOHLOLA.
- (b) LE TSE KA KGELOSETSANG MOTHO TENG.

Ha re kena ditabeng tsena re tla qala ka ho totobatsa nnete ya hore dibe le tsona di na le tshusumetso lenyalong la motho. Kajeno re bona ha diabolose a sebetsa ka matla ho senya lenyalo la motho. Re fumana mosebetsi wa Modimo o le kgahlanong le mosebetsi ona wa diabolose o wa o lwantsha. O lwantsha sebe. Lentswe la Modimo le re: “LENYALO LE TSHWANETSE HO HALALELA”. Re tla hlahlobisa lebaka kapa mabaka ao lenyalo le tshwanetseng ho halalela ka wona:

- (I) Tabeng ya pele ke hobane le hlomilwe ke Modimo.
- (II) Tabeng ya bobedi ke hobane le bontsha Krete le monyaduwa wa hae, e leng phutheho.

MODIMO O HLOMILE LENYALO

Tshimolohong Modimo o ile wa bopa ADAMA. Empa Modimo wa boela wa re: *“HA HO MOLEMO HORE ADAMA A PHELE A NNOTSHI, KE TLA MO ETSETSA MOLEKANE YA TSHWANANG LE YENA”* (GENESI 2:18). Ke ka mokgwa woo Modimo o ileng wa bopa mosadi kateng. Jehova Modimo a bopa mosadi ka lehopo leo a le ntshitseng ho Adama. Adama a re:

“Jwale enwa ke lesapo la masapo a ka, ke nama ya nama ya ka, o tla bitswa mosadi, hobane o ntshitswe ho monna (Genesi 2:23). Mme etlaba nama e le nngwe feela” (Genesi 2:24).

Re bone phutheho ya Modimo hore Modimo o hlomile lenyalo ka lebaka la hoba o sa rate ha motho a phela a nnotshi. Hape Modimo o batla hore ka tlhomo ya lenyalo batho ba tle ba eketsehe lefatsheng. Batho ba tla eketseha ha bana ba tswalwa ka baka la lenyalo. Ke ka mokgwa woo Modimo o hlomileng lenyalo kateng, mme o batla hore le halalele, hape le hlomphehe. Ha motho jwale a silafatsa lenyalo, le se le sa halalele, ka baka la boitshwaro bo bobo lenyalong. Ke bobo bo sa batleheng. Re tla utlwisisa jwale hore ho tloa molao wa Modimo, ke sebe.

Mosebetsi wane o motle wa Modimo tshimolohong ha o bopa Adama le molekane, mosadi jwale wa robaha, wa senyeha. O senngwa ke sebe. Ntlha ya bobedi yeo re e tadimang tlhomong ya lenyalo ke hobane le re bontsha:

(II) KRESTE LE MONYADUWA WA HAE

Hangata Lentswe la Modimo Bibeleng le tshwantsha Jesu Krete e le monyadi mme phutheho e le monyaduwa. Lerato la Jesu Krete ho phutheho ya hae ebile le leholo haholo hoo a bileng a e lefella ka bophelo ba hae ho e reka ho satane ka ho kena lefung. Jwaleka Adama ha a kopantswe le mosadi wa hae ka lenyalo. Ba se ba le nama e le nngwe. Phutheho le yona e kopantswe le Jesu Krete ka tumelo.

Adama ha a bontsha lerato la hae ho mosadi wa hae o re:

“Enwa ke lesapo la masapo a ka, hape ke nama ya nama ya ka” Mosadi o tla kgomarela monna wa hae, le monna o tla mamarela mosadi wa hae, ka bobedi ba bona etlaba nama e le nngwe jwaleka hlooho le mmele ha di le mmeleng o le mong. Lerato la mosadi ho monna wa hae le tshwanetse ho tiya e be la nnete, le se ke la arolwa ke matlakala kapa mamphemphe a senang kelello a lefatshe lena.

Le lona lerato la monna ho mosadi wa hae le tshwanetse ho tiya e be la nnete Ho bona ka bobedi lerato le ba tlama ho ratana. E be ntho e le nngwe. Ba jarelane mefokolo, ha e mong a foseditse e mong. Jwaleka Jesu Krete a sa ka a lahla phutheho ya hae. A ile a tela bophelo ba hae ka baka la lerato la hae ho yona, mosadi le yena a se ke a lahla monna wa hae. Monna le yena a se ke a lahla mosadi wa hae, hoba jwale ke nama e le nngwe.

Monna le mosadi ka bobedi ba bona ha ba tshwanela ho itahlela dibeng tsa bofebe, bootswa kapa bohloa jwaleka batho ba sa dumelang ho Jesu Krete, ba sa tsebeng kgalemelo ya Lentswe la Modimo e leng Bibe. Kajeno re bona manyalo a batho ba nyetseng le ba nyetsweng a qhalwa, a senyeha makgotleng a dinyewe dinaheng ka bophara ba lefatshe. Satane o sebetsa ka matla kajeno ho thibela hore lenyalo le se ke la hlola le hlompheha, jwaleka ha Modimo o le hlomile le hlompheha tshimolohong.

Ke ka lebaka lena kajeno ho atileng dibe tsa bohloa, bofebe, dipeto ho ba baholo le ho ba banyenyane. Baratuwa Moreneng Jesu Krete o hlotse Satane, lefu le lebitla. Ha re mo rapeleng. O ile a bontsha lerato la hae ho phutheho ya hae ka ho e tella bophelo ba hae, e le hore e mong le e mong ya dumelang ho yena a se ke a timela, a mpe a fumane bophelo bo sa feleng. O ile a tshwarela mosadi wa mofebi sebe sa hae yeo re balang ka yena ho Johanne 8:11. Le rona o tla re utlwela bohloko, a re hauhela, a re tshwarele makgopo a dibe tsa rona, ha re ipolela dibe tsa rona.

A RE RAPELENG Jesu Krete Mora Modimo hore a etse hore lenyalo le boele le hlomphehe jwaleka ha Modimo o ne o le hloma le lokile tshimolohong pele sebe se kena ho batho ba pele ADAMA le EVA. Morena Jesu o tla re thusa hobane o mamela thapelo ya moetsadibe e mong le e mong ya tlang ho yena. Ke yena ya reng: *“KOPANG LE TLA FUWA, BATLANG LE TLA FUMANA, KOKOTANG LE TLA BULELWA”*. Morena Jesu o eketsa hape ka ho re: *“NTHO E NNGWE LE E NNGWE YEO LE E QELANG KA LEBITSO LA KA, LE TLA E ETSETSWA”* Morena a ke a re thusa ho kopa ho yena ka thapelo tsohle tsa bohlokwa tseo re di batlang.

Amen.